

LIJE'E SAN JUAN LINIŁPA LIMUC'IPA JESUCRISTO

1 Jifa'a tuya'e' te ts'i'ic' ŁanDios limuc'ipa Jesucristo. Limuc'ipa te lo'iya. Aimicołya ti'ila' tołta'a. ŁanDios quimuc'icopa Jesucristo timuc'itsola' lixanuc'. Małque Jesucristo ummepa łepaluc. Timi: "To'huał'a' pe lopa'a łaimozo Juan. Iłque ti'ay łanic' łainep'i'ipa. To'itsi, tomuc'itsi, iłe łalmuc'ipa ŁanDios." ²Iya' ninJuan aininiłpa jifa'a jahuay laiximpa. Iłe ma' itaiqui' ŁanDios, luya'apa Jesucristo. ³Lataiqui' łaininiłpa jifa'a tuya'e' te ts'i'ic' lixpice'pa ŁanDios. Tixoqui queta łapima noxhuf'iyacola' lipimaye iłta'a al je'e. Jouc'a lapimaye noquimf'eyacu, iłniya naihuejcoyacu, tixoj'ma quileta iłniya. ŁanDios tipaxne'mola'. Aimicołya. Ti'i'ma to łiniłjmpa fa'a.

⁴Iya' ninJuan quini'elhuo' imanc' aipimaye nołmana' lan caitsi quilełołya'. Imanc' ixanuc' ŁanDios, iłque efot'łepolhuo'. Tolafot'łeyołtsi jilpe łolpiłelołya'.

ŁanDios timilhuo': "Capaxne'molhuo', catoc'i'molhuo', capac'e'e'molhuo' łolpicuejma'". Iłque ŁanDios li'ipa ma tipa'a, itsiya tipa'a, ma' anuli iłque łocuaiya.

Ma' anuli timilhuo' lan caitsi Espiritu, łehuoc'ocoyołtsi locutsuya ŁanDios Łalcuxeponga'.

⁵Jouc'a timilhuo' Jesucristo. Iłque tuya'e' ma le'a al łınca. Iłquiya imapa, imaf'inapa, aimimaconaya. Tołta'a i'ipa iłpima iłniya petsi jouc'a timaf'ina'me. Iłque cal Te'a łimaf'inapa tołta'a. Ticuxela' lan tsilaj quincuxepá nomana' fa'a li'a łamats'.

Jesucristo ał'enga' capic'a. Ixcuajaiapa lijuats', i'najtsecopa lałjunac'. Tołta'a aluhuaiłponga' lixcay la'epa, iłe ałfi'eponga'.

⁶Ał'eponga' ixanuc' ŁanDios Łalcuxeponga', iłquiya' i'Ailli' Jesucristo. Ał'eponga' e'aillí ŁanDios, ał'eyi lipenic'.

Iłque Jesucristo ma' anDios. Ma' iłque ticuxe jahuay. iMa tołta'a ti'ila'! Amén.

⁷iTołsinłe! Iłque icuaico'ma jouc'a łummahuay. Tixim'me iłniya lixcai'epá jouc'a jahuay lan xanuc'. Iłne petsi naihuejpa' quilituca' iłpicuejma' tijolij'me caxpaiqui'. Ticuis'e'mołtsi: łTe cał'iyaconga'?

Ne'. Ma tołta'a ti'ila'. Amén.

⁸Minescoyoxi łalPoujna ŁanDios ticua: "Iya' cacui'iyoxi A, cacui'iyoxi Z. Jahuay iya' aipangopa, jahuay iya' cajou'ne'ma. Iya' capa'a itsiya, li'ipa ma' anuli capa'a, ma' iya'

laifcuaiya. Ailopa'a ca'ontcoya, jahuay cacuxe.”

⁹Iya' ninJuan ołpima, ma' anuli lihuejyi Jesús. Ma' anuli ałtełcoyi. Imanc' illanc' ma' anuli ixanuc' Łałcuxeponga', iłque Jesús. Małmana' fa'a li'a łamats' ma' anuli ałsnet'lyi imanc' illanc'.

Iya capa'a jifa'a al isla Patmos. Ałixtuc'opa, alummepa jifa'a al isla. Ałixtuc'opa lainuya'apa litaiqui' ŁanDios, lainu'iyalepa naitsi iłque Jesucristo. ¹⁰Fa'a łamats' Patmos icuaitsi al domingo, iłe litine lacui'impa “Itine łałPoujna”, cal Espıritu Santo ałcuxe iya' laipicuejma'. Jiłpe laixpula' aicuej'ma ałpalaic'o. Ujfxi tipalay. Ti'onłcospa to mifus'mim'me anuli al trompeta. ¹¹Ałmi: “Iłta'a lofximpa tainiłijnla'. Topu'nijnla' jiłpe loje'e. Tijouła' tomme'etsola' lopimaye iłta'a al je'e. Iłne nafot'łepołtsi lan caitsi quitelołya' lomana' łamats' Asia. Tomme'etsola' lapimaye nafot'łepołtsi liłya' Éfeso, jouc'a nafot'łepołtsi liłya' Esmirna, jouc'a nafot'łepołtsi liłya' Pérgamo, jouc'a nafot'łepołtsi liłya' Tiatira, jouc'a nafot'łepołtsi liłya' Sardis, jouc'a nafot'łepołtsi liłya' Filadelfia, jouc'a nafot'łepołtsi liłya' Laodicea.”

¹²Cacua: “¿Naitsi iłque nałpalaic'opa?” Aipai'e'moxi. Aixim'ma acaitsi lan candelero lilanc'ecompa a'oro. ¹³Jiłpe nolojmay lan caitsi candelero tipa'a anuli ti'onłcospa to cal xans. Itoqui lipijahua' ticuaispa mane li'mitsi'. Lofi'ecopa łunxajma' a'oro. ¹⁴Łijuac afujca, ti'onłcospa to al moł, o ti'onłcospa to cal nieve. Li'u' ti'onłcospa to lipał cunga. ¹⁵Li'mitsi'

tepalc'o'i, ti'onłcospa to mipi'em'me łatejma' iłe acobre lopi'empa. Lipalajma cacueca to muna'e', to axpe' panay. ¹⁶Jiłpe al c'a quimane ti'nohi acaitsi lan xamna. Lico tipamma litoqui cutsilo oque' lipix'ay juaiconapa ix'aic'iya. Li'a ti'onłcospa to cal 'ora micuaita menac'o, tepalc'o'i juaiconapa.

¹⁷Laiximpa tołta'a iya' ninJuan ałspajma juaiconapa. Necangenni li'mitsi' to joupa ałmapa. Iłque ałspayaf'pa al c'a quimane. Ałmi: “Aimixpaij'mo'. Iya' NinTe'a. Iya' NiJoujma. Lipangopa lema'a li'a łamats' ma capa'a. Tijou'mola' ma' anuli capajm'ma. ¹⁸Ma' iya' NanDios, Nimaf'i'. Iya' łınca' ałma'apa, ałmapa. Itsiya ałsınłta', ma' aimaf'i'. Aimałmaconaya. Iya' cacuxe lamaya, cacuxe pe lomana' limanapola'.

¹⁹”Joupa aimuc'ipo' naitsi iya' capalaic'ohuo'. Tołiya tainiłła' loximpa, topu'nijnla' loya'apa iłiya, jouc'a tainiłła' lo'iya.

²⁰”Iłniya lan caitsi lan xamna loximpola' jiłpe al c'a caimane, jouc'a iłniya lan caitsi candelero loximpola' aicoxina' te loya'apa iłe loximpa. Iłne lan caitsi lan xamna ti'onłcospola' to lilepaluc' lapimaye łefot'łepola' ŁanDios, iłne nafot'łepołtsi lan caitsi quitelołya'. Lan caitsi candelero ti'onłcospola' to lapimaye nafot'łepołtsi jiłpe lan caitsi quitelołya'.

Iłta'a iłje'e lapimaye nomana' liłya' Éfeso

2 ”Ima' taini'łeta' łilepaluc' lapimaye nafot'łepołtsi jiłpe Éfeso. To'ıta': ‘Tipalaic'ohuo' iłque ts'i'nołıla' lan caitsi lan xamna jiłpe

al c'a quimane. Itque no'huapa nolojmay lan caitsi candelero. Itque timihuo': ²Quimetsaicohuo' te ts'i'ic' lof'epa. Aixina' to'ay laipenic', toxnet'iqui jahuay lo'ipo'. Toxina ipime lapajnya jilpe pe lomana' lixcay xanuc'. Joupa oxingufpola' pe nonescopołtsi: Illanc' ninc'apóstole. Hne a'i apóstole. Joupa oximpola' mane infel'miyale. ³Tama toxina ipime lapajnya, a'nujuaitsi iya', ti'hua toxnet'iqui, aiqixojhuo'. ⁴Linca tipa'a lof'epa aimalatenłma. Al te'a a'epa capic'a juaiconapa. Itsiya a'i. Xonca aijtine ma'ay capic'a. ⁵Camihuo': Tocomma acueca' mecangemma. To'nujuaitsi lo'e'jma' al te'a. Toxhuj'menanni. He lo'epa li'ipa to'econła'. Ja'ni aimoxhuej'menamma aimatcołya cacuaiconno ma pe lofpa'a. Quiłonc'e'e'mo' locandelero. Aimipajnconaya pe lopa'a. ⁶Linca tipa'a al c'a lof'epa. Pe lecu'i'impola' lan nicolaita to'ay copilaic' lo'epa iłniya. Iya' jouc'a ca'ay capilaic' lo'epa. ⁷Naitsi nocuejpa tiquimf'eła' iłe lataiqui' loya'apa cal Espřitu Santo ma mipalaic'ola' lapimaye iłne ixanuc' łanDios, iłque łefot'łepola'. Małniya lapimaye nafołyomma lan caitsi quiłelołya'. Naitsi nolijya capi'i'ma lane titeta łi'as al 'ec lopa'a nolojmay łequeya łanDios. He łaqueya łecui'impal al Paraíso. Naitsi noteja iłe łi'as aimimaya nulemma.'

**Ita'a iłje'e lapimaye
nomana' liłya' Esmirna**

⁸"Jouc'a taini'el'a' hilepaluc lapimaye nafot'łepołtsi Esmirna. To'ila': 'Fa'a tipa'a laifnespa iya'

ninTe'a, niJoujma. Iya' ałma'apa, ałmapa, aimaf'ina, itsiya aimaf'i'. ⁹Iya' quimetsaicohuo' te ts'i'ic' lof'epa, te ts'i'ic' lof'elco'pa, te ts'i'ic' lopepajnya. Aixina' ailopa'a co'huexi fa'a li'a łamats'. Tama ailopa'a co'huexi caxinghuo' acueca' o'huca. Jouc'a aixina' te ts'i'ic' lonesc'epo' lan judıo nocuap'a: Ma' illanc' ixanuc' łanDios. Hne a'i quixanuc' łanDios, mane lefot'łepola' Satanás. ¹⁰Linca xonca tof'elco'conama. Aimixpaj'mo'. Łonta'a joupa ixpic'epa lo'eya. Hualca lopimaye tummem'mola' lacarza, tehuai'im'mola'. Imbama' quitine titełcota. Ima' ti'hua lihuejla'. Tama timitso': Ałma'a'mo', aimopai'i'moxi lopicuejma'. Tijouł'a' quimetsaico'mo' i'hua cal Cuecaj Rey. Capi'icona'mo' lopitine aimijouya. ¹¹Naitsi nocuejpa tiquimf'eł'a' iłe lataiqui' loya'apa cal Espřitu Santo ma mipalaic'ola' lapimaye, iłne ixanuc' łanDios, iłque łefot'łepola'. Małniya lapimaye nafołyomma lan caitsi quiłelołya'. Naitsi nolijya aimimaconaya. He al Cueca' Camaya ailopa'a co'e'eya iłque.'

**Ita'a iłje'e lapimaye
nomana' liłya' Pėrgamo**

¹²"Jouc'a taini'el'a' hilepaluc lapimaye nafot'łepołtsi Pėrgamo. To'ila': 'Fa'a tipa'a laifmipo' iya' ts'ai'huca laicutsilo oque' lipix'ay ix'aic'iya. ¹³Iya' quimetsaicohuo' te ts'i'ic' lof'epa. Nimetsajjma te ts'i'ic' jilpe lofpa'a. Jilpe ma ticuxe Satanás. Aixina' ima' ti'hua lihuequi, ti'hua ał'huaiyinge, aicomenajyoxi. Jilpe petsi ticuxe

Satanás ima'ampa lolpima Antipas, iŋque ma' aŋca uya'a'ma laitaiqui', u'iyale'ma naitsi iya'. Jiŋpe itiné aiquixpaijhuo', aicopai'i lopicuejma'. ¹⁴Linca tipa'a oque' afane' lof'epa aimalatenlcocojma. Tolafot'ŋeyoŋtsi anuli lan xanuc' ituca' lomuc'iyalepa, li'e'jma' ituca'. Iŋe lan xanuc' tihuejyi litaiqui' Balaam, iŋque imuc'i'ma Balac lo'eya ja'ni tuc'uilitisufe'mola' lan xanuc' Israel. Toŋta'a iŋe lan xanuc' Israel ite'me lixic' joupa itsufcompola' landiosla', jouc'a ehue'me laca'no'. ¹⁵Ma' anuli tolafot'ŋeyoŋtsi iŋniya petsi lecui'impola' lan nicolaita. ¹⁶Camihuo': iToxhuej'menni! Ja'ni a'i aimalcoŋya, cacuaita pe lofpa'a. Cafulic'icotola' iŋniya lan xanuc'. Caxcai'ecotola' iŋta'a laicutsilo laipayomma laico. ¹⁷Naitsi nocuejpa tiquimf'eŋa' iŋe lataiqui' loya'apa cal Espiritu Santo ma mipalaic'ola' lapimaye, iŋe ixanuc' ŋanDios, iŋque ŋefot'ŋepola'. Maŋniya lapimaye nafolyomma lan caitsi quiteloŋya'. Naitsi nolijya capi'i'ma lane titela' ŋa'i ŋanDios ŋocupa, ŋacui'impacal maná. Iŋque ŋemiya ca'i, locuenaye xanuc' aiquiŋsina' pe lopa'a iŋque cal maná. Iŋque nolijya capi'i'ma jouc'a cal fujca capic. Iŋque ŋapic tiniŋijnya al ts'e caŋtine. Naitsi ŋapenufya cal fujca capic iŋque ŋinca timetsaico'ma liniŋiya iŋe al ts'e caŋtine, locuenaye aimixinyacu.'

**Iŋta'a iŋje'e lapimaye
nomana' liŋya' Tiatira**

¹⁸”Tainiŋ'eŋa' ŋilepaluc lapimaye nafot'ŋepoŋtsi liŋya' Tiatira. To'iŋa':’Fa'a tipa'a laifnespa iya' i'Hua ŋanDios. Iya' lai'u' ti'onŋcospa to

liŋaŋ cunga, lai'mitsi' ti'onŋcospa to mipi'em'me ŋatejma' iŋe acobre. ¹⁹Iya' quimetsaicohuo' te ts'i'ic' lof'epa. Aixina' to'ehuale capic'a, aixina' loftoc'iyalepa, aixina' toxnet'ŋqui jahuay lo'ipo'. Aixina' li'ipa o'e'ma al c'a. Itsiya xonca acueca' al c'a lof'epa. ²⁰Linca tipa'a lof'epa aimalatenlcocojma iya'. Jiŋpe tapi'i' lane ŋaca'no' Jezabel, iŋquiya inescopoxi aprofeta. Ticua: Cuya'e' linespa ŋanDios. Iŋque mimuc'ila' laixanuc' tifel'mila', toŋta'a iŋe tehueyi laca'no', titeji lixic' joupa itsufcompola' landiosla'. ²¹Iya' joupa ai'huaicopa tixhuej'menanni lo'epa nixpiya. Aiquixhuej'meya. Aiquicuac'. ²²iToxiŋa'! Acueca' cateŋmi'ma ŋaca'no', ti'i'ma quicuana. Tipanehuo jiŋpe lihualfa, aimi'iya mitsahueya. Iŋque ŋaca'no' lo'epa ti'onŋcospa to lan xanuc' Israel li'epa. Iŋe li'ipa enajpoŋtsi ŋilenDios, ihuej'me landiosla'. Jiŋpe pe lofpa'a, petsi aimixtuc'oyacu iŋque ŋaca'no' lo'epa, iŋniya cateŋmi'mola' acueca'. Toŋta'a laif'e'eyacola' iŋniya ja'ni aimixhuej'menamma, ja'ni aimimetsaicoyi lixcay lo'epa iŋquiya ŋaca'no'. ²³Linaxque' ŋaca'no', iŋe ts'ilihuequi, cama'a'mola' nulemma. Toŋta'a limetsaico'ma iya' jahuay lapimaye ni petsi lafolyomma. Ti'i'ma quisina' naitsi iya', iya' ŋinca caxina te ts'i'ic' cal xans lipicuejma'. Pesti xonca lemiya iya' caxina. Ma to lonŋepa toŋta'a ca'naŋtse'e'molhuo' anuli anuli. ²⁴Imanc' unc'ocuenaye nolmana' jiŋpe liŋya' Tiatira, ituca' laifmiyacolhuo'. Imanc' aicolihuequi lomuc'iyalepa ŋaca'no'. Aicolapenufi lataiqui' lacui'impacal: Lataiqui' ipime xom. Iŋe ma

litaiqui' Satanás. Imanc' joupa
 ołsina' te ts'i'ic' licuxe'empolhuo',
 ailopa'a xonca caifcuxeyacolhuo'.
²⁵Ma le'a camilhuo': Imanc'
 joupa olapenufpá Lataiqui'. Ma
 tolihuejle. Aimolanaj'mołtsi. Tama
 iya' ailai'fpa'a ti'hua lihuejla',
 cacuaiconno. ²⁶Naitsi nolijya,
 naitsi jahuay lipepajnya ti'hua
 ti'ay lalatenłcoco'ya iya', iłque
 capi'i'ma limane ticuxe'mola'
 locuenaye xanuc', iłne petsi
 aimimetsaicoyi ŁanDios. ²⁷ŁanDios
 ułfxi ticuxe'mola' iłniya lan xanuc'.
 Ti'onłcotola' to lapixu. Tepaco'mola'
 anuli lapaluc ilanc'ecompa atejma'.
 Ti'em'mola' epi' epi'. Tołta'a laimane
 joupa alapi'ipa cai'Ailli', ma tołta'a
 limane capi'i'ma cal xans nolijya.
²⁸Jouc'a capi'i'ma cal xamna
 quili'ejma'. ²⁹Naitsi nocuejpa,
 tiquim'ela' iłta'a lataiqui' loya'apa
 cal Espıritu Santo ma mipalaic'ola'
 lapimaye, iłne ixanuc' ŁanDios
 łefot'łepola'. Małniya lapimaye
 nafotıyomma lan caitsi quilełoıya.'

**Hta'a iłje'e lapimaye
 nomana' liıya' Sardis**

3 "Taini'ela' hilepaluc lapimaye
 nafot'łepołtsi liıya' Sardis.
 To'ıla': 'Fa'a tipa'a laifnespa iya'
 ts'ai'hueca lan caitsi li'Espıritu
 ŁanDios, jouc'a ai'nołila' lan caitsi
 lan xamna. Iya' quimetsaicohuo' te
 ts'i'ic' lof'epa. Ticuanni ima' omaf'i'.
 Iya' caxingufhuo' joupa imapo'.
²Ima' tomaf'i'ixoxi, topo'noła'
 cuenna. Tofaxoxi lopicuejma',
 to'econa'ma al c'a. Ja'ni a'i, aimi'ıya
 mo'econaya. Jahuay lo'epa
 aixina' ailopa'a quetenłcocojma
 ŁanDios, ni anuli. Jahuay lo'epa

tehue'e'. ³Camihuo': To'nujuaitsi
 te ts'i'ic' lataiqui' lomepenufpa,
 iłe joupa oquim'fepa. Taihuejla'.
 Toxhuj'menni. Ja'ni aimopo'nohuo
 cuenna iya' cacuaihuo to micuaihuo
 cal namas no'huapa lipuqui'.
 Toxim'ma łaxpaiqui'. ⁴Łınca jılpe
 Sardis timana' oquexi' afantsi
 loxanuc' aiquixis'mecoyołtsi.
 Iłne mane afujca liłpijahua'.
 Latenłcocojma. Le'me anuli. ⁵Naitsi
 nolijya tipo'no'im'me al fujca
 lipijahua'. Lipuftine tipanehuo jılpe
 al je'e petsi liniłingila' liłpuftine
 iłne limaf'ila'. Aicatufc'eya lipuftine.
 Pe lomana' cai'Ailli' y lepaluc'
 quema'a iya' cu'ıtola': Iłque cal xans
 tołta'a lipuftine, łınca lihuequi.
⁶Naitsi nocuejpa, tiquim'ela' iłe
 lataiqui' loya'apa cal Espıritu Santo
 ma mipalaic'ola' lapimaye iłne
 ixanuc' ŁanDios, iłque łefot'łepola'.
 Małniya lapimaye nafotıyomma lan
 caitsi quilełoıya.'

**Iłta'a iłje'e lapimaye
 nomana' liıya' Filadelfia**

⁷"Taini'ela' hilepaluc lapimaye
 nafot'łepołtsi Filadelfia. To'ıla':
 'Fa'a tipa'a laifnespa iya' ninŁınca,
 nimPaxi. Iya' ai'hueca hiyahui
 cal rey David. Iya' ti'hua laimane
 caxi'e'ma, tijouła' ailopa'a
 noxnıfcoya. Jouc'a ti'hua laimane
 caxnıfco'ma, tijouła' ailopa'a
 naxi'eya. ⁸Iya' quimetsaicohuo'
 te ts'i'ic' lof'epa. Aiximp'o' iłe
 litine, tama a'ij cueca' lopułfxi, ma
 ti'hua taihuejcojma laitaiqui'. Ima'
 aicomenajyoxi, ti'hua lihuequi.
 Tołta'a jılpe loııya' ainexi'epa anuli
 al puerta. Iłe al puerta ailopa'a
 noxnıfcoya. ⁹Ałcujela', cu'ılhuo'

laif'eya. Joupa' aixpic'epa lo'iyacola' ihne tefot'lepola' Satanás, ihniya infel'miyale judío, ihne lonespa a'ij linca. Tinesyi: Ma le'a illanc' ixanuc' ÆanDios. Ihniya a'i quixanuc' ÆanDios. Ihne ticuaita pe lofpa'a, texc'onkingoñai'mo' jilpe lo'mitsi'. Timetsaico'mo' iya' ai'epo' capic'a. ¹⁰Ima' linca oxnet'Ïpa, omihuequi laitaiqui' laÏpalaicopa iya' laixnet'Ïpa. Tuya'e' toxnet'Ïa' jouc'a. Toñiya ca'e'mo' cuenna ticuaita al cueca' cateñcuya locuaicoya. Ihe lateñcuya tixingufco'me lan xanuc' nomana' ni petsi li'a ñamats', tehuai'imola'. ¹¹iAñcuejla'! Iya' aimañcoñya, cacuaicoconno. Ima' tipa'a ts'o'hueca, ihe lainepi'ipo'. To'e'ela' cuenna. Ja'ni a'i aimimetsaiconyaco' ima' i'hua ÆanDios, iñque cal Cuecañ Rey. ¹²Naitsi nolijya capo'no'ma nulemma jilpiya lixoute' ñainenDios. Jilpe ti'onñcota to limula joupa lifayipa. Mañpe al xoute' tipanehuo, aimipaya. Iñque cal xans quiniñinc'e'ma afane' laftine. Quiniñinc'e'ma lipuftine ñainenDios. Quiniñinc'e'ma lipuftine lipiñya' ñainenDios, iñiya liñya' al ts'e quilñya' Jerusalén laimuyoya lema'a pe lopa'a ñainenDios. Jouc'a quiniñinc'e'ma al ts'e laipuftine. ¹³Naitsi nocuejpa, tiquimf'ela' iñta'a lataiqui' loya'apa cal Espñritu Santo ma mipalaic'ola' lapimaye ihne ixanuc' ÆanDios, iñque tefot'lepola'. Mañniya lapimaye nafotñomma lan caitsi quileloñya'.

**Iñta'a iñje'e lapimaye
nomana' liñya' Laodicea**

¹⁴”Tainiñ'ela' tilepaluc lapimaye nafot'lepoñsi liñya' Laodicea. To'ila': 'Fa'a tipa'a laifnespa iya'.

Iya' ninAmén. Calinc'i jahuay loxpíc'epa ÆanDios. Iya' cuya'e' al linca, aica'eyoxi ma le'a laipicuejma'. Jahuay ÆanDios lixpíc'epa tilanc'ente ma' iya' aipangopa, ailanc'epa. ¹⁵Iya' quimetsaicohuo' te ts'i'ic' lof'epa. Aixina' lo'ejma'. Ma' afule malihuequi. Iya' ca'onñicohuo' to laja' a'i quinu' a'i quitinuhua. ¹⁶Ca'onñicohuo' to laja' huata caquinu'. Toñta'a caxits'ehuo', aicaxnet'ñconaya, canajcuf'mo'. ¹⁷Tocua: Iya' ai'hueca. Acueca' ihe lainulijpa, ailopa'a calahue'epa. Ima' aicoxina' te ts'i'ihuo'. Ima' a'ijc'a juaiconapa lofmuyaicopa. Ima' uncueca' cuanuc', ailopa'a co'hueca, ima' umfo', tocomma um-mila. ¹⁸Cu'ihuo' lof'eya: To'ñañ iya laifcujpa. To'ñañ co'oro joupa ipi'empa iñpifuc, ma ipa'ampa ñunga. Toñta'a ti'i'mo' ts'o'hueca. To'ñañ copijahua', ihe al fujca lopijahua', topo'noñta'. Toñta'a aimi'iconaya cum-mila. Aimotaiya calaic'ata. To'ñañ comeñxi, tomet'ñña' lo'u, tijouñta' al c'a tahuetsale'ma. ¹⁹Jahuay laif'epola' capic'a, ja'ni ixcañ lo'epa, iya' catale'mola', caxc'ai'i'mola', tipai'itsoñsi liñ'ejma'. Ti'e'le al c'a. Toñta'a camilhuo' anuli anuli imanc': Toxpíc'ela' lihuejla' al c'a. Toxhueñmenanni li'ipa lo'ejma'. ²⁰iAñcuejla'! Joupa aicuai'ma, caje'e' fa'a al puerta. Cal xans nañquimf'eya iya' laifpalaipa, laxi'ela' al puerta, iya' catsufai'ma jilpe lejut'ñ, añsmoco'me nuli. ²¹Naitsi nolijya capi'i'ma lane añcutsolaime fa'a pe laifcutsuya, añcuxe'me nuli. Iñque lo'iya ti'i'ma to iya' lañ'ipa. Iya' ate'a ainulijpa, lijoupa aicutsingaipa pe locutsuya

cai'Ailli', ałcuxeyi. ²²Naitsi nocuejpa, tiquimf'ela' itta'a lataiqui' loya'apa cal Espíritu Santo ma mipalaic'ola' lapimaye ihne ixanuc' LanDios, ihque łefot'łepola'. Małniya lapimaye lafołyomma lan caitsi quitelołya.'”

4 Lijoupa lałmipa tołta'a aiximpa jilpe lema'a tipa'a al puerta exiya. Aicuejcona'ma ałpalaic'o. Ihque lopalaipa ti'onłcospa to mifus'mim'me al trompeta. Ihque ałmi: “Tof'acunni. To'huanni fa'a. Camuc'i'mo' lo'iya. He laifmuc'iyaco' al linca, ma ti'i'ma.” ²Małpe 'hora aixingufcopa cal Espíritu Santo ałcuxe jilpe laipicuejma'. Jilpe lema'a aiximpa lexpats'qui li'nofquiya. Jilpe tipa'a al 'asiento acueca' to li'asiento lan rey. He al 'asiento tipa'a naitsi nocutsafya. ³Ihque Nocutsuya li'a tocomma mane epalc'o', to lepalc'opa lapic' liłpuftine ajaspes y acornalino. Jilpe lexpats'qui li'nofquiya canumicay tipa'a lupaje. He lupaje tepalc'o'i axhuaica to lepalc'opa łapic cuftine esmeralda. ⁴Aixim'mola' anuxans malpu' lan tsilaj asiento. Ticutsafcolanna anuxans malujxi' lan tsilaj xanuc' noxpipjá lataiqui'. Lexpats'qui li'nofquiya lopa'a nolojmay ihniya. Ihne anuxans malujxi' lan tsilaj xanuc' afujca liłpjuhua'. Jilpe hiłjuac anuli anuli itaic' licorona ilanc'ecompa a'oro.

⁵Jilpe lexpats'qui li'nofquiya tixcafi, tipalołaiyi, tuna'e'. Lihuec'ocojma lexpats'qui li'nofquiya tunaqui acaitsi lepalalc'o', ihne lan caitsi li'Espíritu LanDios. ⁶Lihuec'ocojma lexpats'qui li'nofquiya tipa'a tocomma to łaja

lilanc'ecompa apulu, al c'a vidrio cuftine acristal. He al vidrio ti'i'ma tixim'ma acajm'maica. Pe lopa'a lexpats'qui li'nofquiya, ihniya lam malpu' quiesquina, nolojmay jilpe aixim'mola' amalujxi' lam paxi quinnejja. Ihne imanna ca'u'. Ihne liłspula' jouc'a liłcu'u imanna pangay ca'u'.

⁷Cal te'a hinneja ti'onłcospa to calxmu. Łocuena ti'onłcospa to cal toro. Łocuena'ya li'a ti'onłcospa to li'a cal xans. Łocuena'ya ti'onłcospa to cal cuecaj cui łaiyupa. ⁸Lam malujxi' quinnejja anuli anuli tipa'a acamts'us hiłxala'. Ihniya hiłxala' imanna pangay ca'u'. Jilpe lixpula' quihxala' lijuihuay tipa'a pangay ca'u'. Jouc'a licu'u quihxala' tipa'a pangay ca'u'. Ihniya linnejja aimixospola'. Itine ipuqui' tuya'ayi:

“Apaxi, apaxi, apaxi lałPoujna LanDios, ihquiya cal Cuecaj Rey, jahuay ticuxe.

Li'ipa ma tipa'a, itsiya tipa'a, ma' anuli ihque łocuaiya.”

⁹Ihniya lam malujxi' quinnejja tołta'a lopalaicopa LanDios. Timetsaicoyi anDios, timetsaicoyi cal Cueca'. Tix'najtsi'iyi małquiya Nocutsuya jilpe lexpats'qui li'nofquiya. Ihquiya ti'hua imaf'i, aimimaya. ¹⁰Mipalaiyi tołta'a ihniya linnejja, lan nuxans malujxi' lan tsilaj xanuc' noxpipjá lataiqui', text'onłingotaiyi łamats' ehuoc'oco'me Nocutsuya jilpiya lexpats'qui li'nofquiya. Ihquiya imaf'i, aimimaya. Tipa'ayi liłcorona, tipo'noyi małpe huejnca lexpats'qui li'nofquiya. Timiyi Nocutsuya jilpe:

¹¹“Ma' ima' małPoujna, ma' ima' malanDios.

Ma' ima' jahuay nipajnya to'e'ma.
Ailopa'a cocuena cañescoyacu
tofta'a, aimi'iya.

Ima' olanc'epola' jahuay.

Al te'a ailopa'a, ma' ima'
oxpic'epa ti'itla', oxpic'epa
tilanc'em'me."

5 Aixim'ma anuli al je'e
ijuisquiya i'noł'ma al c'a
quimane itque Nocutsuya jilpe
lexpats'qui li'nofquiya. Ite al je'e
inilingiya jilpe licu'u jouc'a lixpula',
acaitsi cal sello enantsi'icoya.

²Aixim'ma anuli cal cuecaj
capaluc quema'a, tipalay ujfxi,
ticua: "¿Naitsi ti'i'ma tits'ał'ma lan
sello, tuxpalaif'ma lunts'iquiya al
je'e?" ³Ailopa'a nots'ałya lan sello,
muxpalaif'ya al je'e. Ni jilpe lema'a
ni li'a łamats' ni al 'ocay camats'.

⁴Aijoj'ma juaiconapa. Ailopa'a
noxpalaif'ya al je'e mixhueya, ni
mehuelojnya. Ni anuli mi'iya.

⁵Anuli itniya lan tsilaj xanuc'
ałpalaic'opa, ałmi: "Aimojoj'ma.
Toxinla', jifa'a tipa'a itque łecui'impa
calXmu. Cal te'a hitatahuelo
cuftine Judá. Itquiya Judá jouc'a
itatahuelo David. Itque łecui'impa
calXmu joupá ulijpa. Totfta'a
ti'i'ma tits'ał'ma lan caitsi sello,
tuxpalaif'ma lijuisquiya al je'e."

⁶Aixim'ma anuli Ła'huaj Moł
teaxu jilpiya. Itque ti'onłcospa
to ła'huaj moł hima'ampa,
łitsufcompa ŁanDios. Tecaxu
mane ehuc'ocojma lexpats'qui
li'nofquiya. Lijuihuay timana'
lam malujxi' lam paxi quinneja
jouc'a lan nuxans malujxi' lan
tsilaj xanuc'. Itque Ła'huaj Moł
tipa'a acaitsi łıpecala, acaitsi
li'u'. Hne li'u' lan caitsi li'Espiritu

ŁanDios, joupá ummempola' tiyete
ni petsi li'a łamats'. ⁷Ła'hua Moł
i'hua'ma, i'noł'ma lijuisquiya al
je'e, ite li'noł'ma al c'a quimane
itque Nocutsuya jilpe lexpats'qui
li'nofquiya.

⁸Lijou'ma li'nołpa al je'e Ła'huaj
Moł, epatshuołai'me lam malujxi'
lam paxi quinneja jouc'a lan
nuxans malujxi' lan tsilaj xanuc',
tummoc'oyi Ła'hua Moł. Itniya
lan tsilaj xanuc' anuli anuli tipa'a
lił'harpa jouc'a itaic' liłtaza
lilanc'ecompa a'oro, imanna łıpac'ec,
ite locuajmaispa loxahue'epa
lixanuc' ŁanDios, itniya i'huexi
ŁanDios. ⁹⁻¹⁰Itne lan tsilaj xanuc'
ats'e lonac'copa. Litaiqui' tuya'e':

"Ima' joupá ima'ampo', otsufcopa
lojuats', o'najtsepa liłjunac' lan
xanuc' ni petsi liyoyomma.
Itne lan xanuc' ituca' ituca'
liłtaiqui', ituca' ituca' liłpiłya',
ituca' ituca' liłnación.

O'epola' ixanuc' łalanDios, itque
cal Cuecaj Rey.

O'epola' a'aillı', mepi'ipola'
liłmane, ticuxeta li'a łamats'.

Tołiya icueya lomane, o'nołpa
lijuisquiya al je'e, ti'i'ma
tots'ał'ma liello."

¹¹Lijou'ma aixim'mola' axpela'
lapaluc' quema'a. Itniya timana'
canumicay lan tsilaj xanuc' petsi
al canumicaica lam paxi quinneja,
itniya linneja tecaxhuołanna lam
malpu' qui'esquina lexpats'qui
li'nofquiya. Tofta'a lexpats'qui
li'nofquiya lopa'a nolojmay jahuay
itniya. Axpela' axpela' itniya lapaluc'
quema'a nomana' jilpiya. Aimi'iya
moxhuj'meyacola'. Aicuej'ma
tipalquinni. ¹²Tipalayi ujfxi, ticuayi:

“Ła'hua Moł, iħque ima'ampa,
itsufcompa, małque ti'i'ma
tepenuf'ma la'alanbanza.
Iħque nipajnya ti'e'ma jahuay,
jahuay i'hueca, ailopa'a
cahue'epa,
xonca acueca' lipicuejma',
ailopa'a nolijya tołta'a.
Iħque xonca ipujfxi, xonca
timetsaicom'me,
timetsaicoyi al Cueca' Xonca.
Iħque ma' anDios.
iAłs'najtsi'ih'e!”

¹³Lijou'ma aicuej'mola' tipalquinni
jahuay ts'iħmaf'i lilanc'epola'
ŁanDios. Iħniya nomana' lema'a,
nomana' li'a łamats', nomana' al
'ocay łamats', nomana' łaja. Ni petsi
ticuayi:

“Ałs'najtsi'ih'e iħque Nocutsuya
lexpats'qui li'nofquiya,
alimetsaicole cal Cueca'
Xonca.
Iħque ma' anDios, jahuay ticuxe.
Ma' anuli ałs'najtsi'ih'e Ła'hua
Moł.
Tijauhuamlaicota litine tołta'a
ti'ih'a.”

¹⁴Lam malujxi' lam paxi quinneja
ticuayi: “Tołta'a ti'ih'a. Amén.”

Lan tsilaj xanuc' exc'onłingolaime,
tummoc'oyi Nocutsuya lexpats'qui
li'nofquiya, jouc'a tummoc'oyi
Ła'hua Moł.

6 Iya' cahuelonge, aixim'ma
Ła'hua Moł lits'ałma anuli
iħniya lan caitsi sello. Aicuej'ma
tipalay anuli iħne lam malujxi'
lam paxi quinneja, tocomma to
muna'a'ma. Ticua: “iTo'huanni!”

²Lijou'ma aixim'ma joupa icuai'ma
anuli cal fujca caihuala. Łocutsafya
łaihuala i'nołi lomf'ants'. Epi'im'me

licorona, ipanni tulijcale. Linca
ti'hua tulijcalecona'ma.

³Ła'hua Moł lits'ałcona'ma
łocuena sello, aicuej'ma tipalay
łocuena iħne lam malujxi' lam paxi
quinneja. Ticua: “iTo'huanni!”

⁴Icuai'ma łocuena caihuala.
Iħque łaihuala ma' unxali. Iħque
łocutsafya epi'im'me limane ti'e'ma
tifulete lan xanuc' nomana' li'a
łamats', tima'a'mołtsi anuli anuli.
Epi'im'me juaiconapa itoqui licutsilo.

⁵Lijou'ma Ła'hua Moł
its'ałcona'ma łocuena sello. Tołta'a
i'ipa afane' lan sello lits'ałpola'.
Aicuej'ma tipalay łocuena iħne lam
malujxi' lam paxi quinneja. Ticua:
“iTo'huanni!”

Aixim'ma icuai'ma łumi caihuala.
Iħque łocutsafya łaihuala i'nołi
calxpicołma. ⁶Aicuej'ma tocomma
tipalquinni jilpe nolojmay pe
lomana' iħne lam malujxi' lam paxi
quinneja. Ticuayi: “Linca ti'i'mola'
huata cal trigo, lan cebada. Tiłof'ma
liłpitali. Anuli kilo cal trigo lipitali
lolijpa anuli quitine cal xans. Afane'
kilo lan cebada lipitali lolijpa
anuli quitine cal xans. Timanecu
lan oliva laipamma caceite, jouc'a
lan 'uva laipamma al vino. Iħniya
aimomints'e'mola'.”

⁷Lijou'ma Ła'hua Moł its'ałcona'ma
łocuena sello. Tołta'a i'ipa amalpu'
lan sello lits'ałpola'. Aicuej'ma
tipalay łocuena quinneja, ticua:
“iTo'huanni!”

⁸Aixim'ma icuai'ma łefouc'o
łaihuala. Tocomma ailopa'a
quijuats'. Iħque łocutsafya łaihuala
lipuftine Lamaya. Iħuequi anuli
cuftine Hades. (Tołta'a lecuim'pa
jilpe pe lomana' lamizhua.)

Ihque łocutsafya łaihuala
epi'im'me limane ticuxe'ma hualca
li'a łamats'. Petsi petsi ticuxe'ma
hualca. Ni petsi locuxeya iłque
tima'a'mola' lan xanuc'. Hualca
tima'aco'mola' acutsilo. Hualca
tima'aco'mola' cumemma. Hualca
tima'aco'mola' al cuana. Locuenaye
tima'a'me lan ximalo quinnejá.

⁹Ła'hua Moł its'ałcona'ma
łocuenaj sello. Tołta'a i'ipa amaque'
lan sello lits'ałpola'. Aixim'mola'
li'álma lapimaye nimanapola'.
Iłniya nepenufpá łitaiqui' ŁanDios,
uya'a'me, ihuej'me iłe łataiqui'.
Tołiya ixtuc'om'mola', ima'am'mola'.
Iłniya li'álma timana' al 'ocay jilpe
al altar. Iłe al altar ti'onłcospa to
al altar petsi titsufcoyi ŁanDios.
¹⁰Iłniya tija'ayi ułfxi, ticuis'eyi,
timiyyi ŁanDios: “Ima' małPoujna,
illanc' omozó. Ima' umPaxi, ima'
unŁınca, aimofel'miyale. ¿Te
ti'hua ticoł'mo'? ¿Te aimal—
lınc'ıyaconga'? ¿Te aimoteł'miyacola'
iłne nałma'aponga'? Iłne jouc'a
lıf'as xanuc' nomana' li'a łamats',
ma' anuli li'ejma'.”

¹¹Anuli anuli iłniya nopalai pá
tołta'a, umim'mola' afujca liłpijahua'.
Timila': “Tehue'e' huata. Ti'hua
tulunxajle. Tixhuai'ni'mola'
lołpimaye, iłniya jouc'a imozó
ŁanDios liłPoujna. Iłniya
jouc'a tima'am'mola'. Tijouła'
tima'antsola' łınca cateł'mi'mola'
iłne ninma'ahuale pá, jouc'a iłniya
nima'apolhuo' imanc'.”

¹²Aixim'ma Ła'hua Moł
its'ałcona'ma łocuena sello. Tołta'a
i'ipa acamts'us lan sello lits'ałpola'.
Iłe'ne'ma acueca' cunanto. Cal 'ora
i'i'ma umi umi, tocomma to lijahua'

mipo'noyi nohuotsopá. Litojpa
mut'ła i'i'ma cunxali to lajuats'.
¹³Łan xamna nomana' lema'a
ecangołenca łamats'. Iłe li'ipola'
lan xamna ti'onłcospa to lo'ıya li'as
'icux mi'hua'ma ułfxi cahua', tife'ne
lımané al 'ec, łaxhuaıca qui'as
tecangołecu. ¹⁴Lema'a ijuis'moxi
to anuli al je'e, ijuisquim'me,
ejac'e'moxi. Lijualay jouc'a łamats'
ısla, jahuay iłniya iłonc'em'me.
Ailopa'a quipaneya pe lopa'a al te'a.
¹⁵Li'ipa tołta'a jahuay lan xanuc'
inulna'me. Emi'mołtsi lunts'ejay,
jouc'a emi'mołtsi lijualay pe lopa'a
lan tsilaj capic'. Iłne lan xanuc',
ja'ni lan rey nocuxepá fa'a li'a
łamats', ja'ni lan tsilaj xanuc', ja'ni
lan tsilaj soldado nocuxepá lił'as
soldado, ja'ni lan xanuc' ts'iłhueca
acueca', ja'ni acueca' quiłpułfxi, ja'ni
notahuaıcopá tipa'a liłpoujnałá,
ja'ni ailopa'a quiłpoujna, jahuay
ma' anuli emi'mołtsi. ¹⁶Tipalaıc'oyi
lijualay jouc'a lan tsilaj capic',
timiyyi: “Tonłacangołenca,
alamıtsonga'. Aimałsim'monga'
iłque Nocutsuya jilpe lexpats'qui
li'nof'quiya. Aimałteł'mi'monga'
Ła'hua Moł. Iłque ixtunni. ¹⁷Joupa
ıcuai'ma al Cuecaj Quitine. Iłne
nulemma timuj'me liłpoyac'. ¿Te
naitsi noxnet'ıya?”

7 Lijou'ma aixim'mola' amalujxi'
lapaluc' quema'a tecaxołanna
jilpe lam malpu' quiju' łamats'.
Iłniya tipa'neyi łahua', aimıtsufai'ma
ni anuli quiju' łamats'. Aimi'hua'ma
cahua' łamats'. Aimi'hua'ma cahua'
łaja. Aimi'hua'ma, aimıfenna ni
anuli al 'ec. ²Aixim'ma ıcuai'co'ma
ocuena capaluc' quema'a. Iłque
tıf'aqui pe łaipammaıyomma

cal 'ora. Itaic' lisello Limaf'i
 CanDios. Tijoc'ila' lam malujxi'
 capaluc' quema'a, iñniya petsi
 joupa epenufpá liñmane timints'ete
 lamats', jouc'a timints'ete lopa'a
 jilpiya. Timints'ete laja jouc'a lopa'a
 jilpiya. Tivalaic'ola' ujfxi, ³timila':
 "Toł'huaicołe. Aimotmints'e'me
 lamats' ni lopa'a jilpiya.
 Aimotmints'e'me ni anuli al 'ec.
 Ate'a lunanc'i'mola' cal sello hilepali
 iñniya no'epá lipenic' ŁanDios, iłque
 hiłPoujna. Tijouła' tołteł'mi'mola'
 locuenaye xanuc'."

⁴Lijou'ma aicuej'ma tojua
 mimana' iñniya nepenufpá cal
 sello. Ixhuaitsole' amaxnuj oquej
 nuxans malujxij mil lan xanuc'.
 Lihtatahueló iñniya inaxque' cal
 xans Israel. ⁵Iñniya lunanc'impola'
 quilsello, limbamaj coquej mil
 iñne hihtatahuelo cuftine Judá.
 Locuenaye imbamaj coquej
 mil hihtatahuelo cuftine Rubén.
 Locuenaye imbamaj coquej
 mil hihtatahuelo cuftine Gad.

⁶Locuenaye imbamaj coquej mil
 hihtatahuelo cuftine Aser. Locuenaye
 imbamaj coquej mil hihtatahuelo
 cuftine Neftalí. Locuenaye imbamaj
 coquej mil hihtatahuelo cuftine
 Manasés. ⁷Locuenaye imbamaj
 coquej mil hihtatahuelo cuftine
 Simeón. Locuenaye imbamaj
 coquej mil hihtatahuelo cuftine
 Leví. Locuenaye imbamaj coquej
 mil hihtatahuelo cuftine Isacar.

⁸Locuenaye imbamaj coquej
 mil hihtatahuelo cuftine Zabulón.
 Locuenaye imbamaj coquej mil
 hihtatahuelo cuftine José. Locuenaye
 imbamaj coquej mil hihtatahuelo
 cuftine Benjamín.

⁹Lijou'ma aixim'mola' axpela'
 lan xanuc' efołya jilpiya.
 Axpela' juaiconapa, aimi'liya
 moxhuej'meyacola'. Iñniya
 quiyoyomma jahuay lan nación
 lomana' li'a lamats', jahuay hiłelołya'.
 Ituca' ituca' lihtatahueló, ituca' ituca'
 lihtaiqui'. Iñniya tecaxingołanna
 tehuelojnyi lexpats'qui li'nofquiya,
 tehuelojnyi Ła'huaj Moł. Afujca
 itoqui liłpijahua', ił'nołi liłxanghue.

¹⁰Tivalaiyi ujfxi, ticuayi:

"ŁanDios, Nocutsuya jilpe
 lexpats'qui li'nofquiya,
 jouc'a Ła'hua Moł, ma' iñniya
 alunł'eponga'."

¹¹Jilpe lexpats'qui li'nofquiya,
 canumicay, timana' jahuay lapaluc'
 quema'a jouc'a lan tsilaj xanuc',
 jouc'a lam malujxi' lam paxi
 quinneja. Iñniya ixpats'cołenca
 ilimetsaijma ŁanDios. ¹²Ticuayi:

"Tołta'a ti'ila', amén.

Ma' łalanDios limetsaico'me cal
 Cueca', ma' iłque ałmi'me:
 'Ima' oxina' jahuay, ima'
 malanDios, ałs'najtsi'ihuo',
 ima' unCueca' Xonca, jahuay
 ti'i'ma to'e'ma, ima' xonca
 opujfxi, ima' aimopai'iyoxi.
 Itsiya litine jouc'a locuaicoya
 quitine, tołta'a mopa'a.'
 Tołta'a ti'ila', amén."

¹³Anuli iñne lan tsilaj xanuc'
 alicuis'epa, ałmi: "Iñniya lan xanuc'
 afujca itoqui liłpijahua', ĩnaitsi
 iñne? ĩPetsi quiyoyomma?"

¹⁴Aitalai'e'e'ma, cami: "Maipoujna,
 ima' oxina'". Iłque ałmi'ma: "Iñniya
 lipalyomma al cueca' catełcoya.
 Epajcopa liłpijahua' lijuats'
 lixcuajaipa Ła'huaj Moł. Tołta'a i'ipa
 afujca liłpijahua', aicunxalaic'.

¹⁵ "Toliya itsiya tecaxingolanna
tehuelojnyi lexpats'qui
li'nofquiya pe locutsuya
ŁanDios.

İhne itine ipuqui' ti'eyi lipenic'
ŁanDios jilpe lipaxi quejut'ı.
Timanecu anuli ŁanDios, itque
Nocutsuya li'nofquiya, itque
ti'hua ti'e'mola' cuenna.

¹⁶ Aimunle'econayacu,
aimicuiconaya quijja'.
Cal 'ora aimipi'econayacola',
aimixinyacu ni tołta'a quinu'.

¹⁷ Ła'hua Moł, itque Nopa'a
nolojmay laquiju' lexpats'qui
li'nofquiya,
itque ti'e'mola' cuenna, tixinnola'
to imot'ı, itque itPoujna.
Tileco'mola' petsi laipayomma
laja', ihya laja' tepi'ila' liłpitine
aimijouya.
ŁanDios tetufc'ena'mola' lilujay
ihne lixanuc', aimijojconayac
u."

8 Ła'huaj Moł its'ałcona'ma
hijoujma sello. Joupa its'ałpola'
lan caitsi sello. Lijou'ma jilpiya
lema'a i-ch'ixco'mola'. Icoł'ma
to nolojmay 'hora. ²Aixim'mola'
acaitsi łapaluc' quema'a. İhniya
tecaxolanna tehuelojnyi jilpe pe
lopa'a ŁanDios. İni'im'mola' acaitsi
liłtrompeta. Anuli anuli i'nołi
litrompeta. ³Icuaiyunni ocuena
capaluc quema'a. Ecaxingai'ma jilpe
al altar pe lopi'eyompa hipac'ec. İte
al altar ehuoc'ocojma lexpats'qui
li'nofquiya. Łapaluc quema'a i'nołi
lopi'ecompa hipac'ec, lilanc'ecompa
a'oro. Epi'im'me acuecaj hipac'ec.
Lepi'im'me tipi'ela' ma mixa'hueyi
ŁanDios ihniya i'huexi. İhne
noxa'huepá, hıłtaiquí ihniya jouc'a

hipac'ec łopipa, tif'ajjomma jilpe al
altar lilanc'ecompa a'oro. ⁴Łapaluc
quema'a mejuaf'i'ma hipac'ec hıcxıs
tif'aqui, jouc'a tif'aqui hıłtaiquí
lixanuc' ŁanDios, ihne noxa'huepá.

⁵Lijou'ma łapaluc quema'a
i'noł'ma lopi'ecompa hipac'ec,
ima'ne'ma cunsuac' lopa'a jilpe
al altar, eca'ni'ma jılta'a lunsuac',
ecangołenca łamats'. Lijou'ma
tunalequi, tija'anni, tuxcuafi,
ife'ne'ma inu'ma łunanto.

⁶Łan caitsi łapaluc' quema'a,
ihniya petsi anuli anuli tipa'a
liłtrompeta, i'noł'me liłtrompeta,
tuna'me lan caitsi. ⁷Cal te'a łapaluc
quema'a tunay litrompeta. İyuj'ma
hi'ay cacui, jouc'a łunga ihuants'i
cajuats'. İtque hi'ay cacui iteł'mi'ma
łamats'. Łamats' jouc'a cal 'ec'
etełnufila' afane'. Anuli ipina'ma,
tipanemma oque'. Laixhuaica pajac
ipina'ma.

⁸Łocuenaj łapaluc quema'a tunay
litrompeta. Tocomma to anuli
hijuala łonajpa i'niym'maitsi łaja.
Tołta'a anuli parte łaja i'i'ma cajuats',
oquej parte a'i.

⁹Jilpe łaja ts'ihmaf'i' nomana' jilpe
łajuats' caja imana'mola'. Nomana'
jilpe al c'a caja timanemma ihmaf'i'.
Ma tołta'a ejac'pola' lan tsilaj barco
lomana' łaja.

¹⁰Łocuena łapaluc quema'a tunay
litrompeta. Joupa i'ipa afantsi
nunapa. Anuli cal cuecaj xamna
ecangenni lema'a. İtque cal xamna
tunaqui, tocomma oli, ecangaf'caita
cal panay jouc'a petsi laipayomma
łajay. Tipa'a petsi licajm'maitsi,
petsi a'i. (Tołta'a ja'ni anuli al
pana' ixim'ma lonajpa, timanemma
oque' cal panay petsi aiquixim'me

tofta'a.) ¹¹ Hque cal xamna cuftine Acuj Ajenjo. (Ła'hua c'ec ajenjo, iħque acuá juaiconapa.) Ni petsi lecangaf'caita lonajpa cal xamna, laja' i'ipa acuá to ajenjo. Lan xanuc' lixna'me al cua caja' imana'mola'.

¹² Łocuenaj łapaluc quema'a tunay litrompeta. Joupa i'ipa amalujxi' nunapa. Luna'apa litrompeta iminscom'mola' cal 'ora, cal mut'ła, lan xamna. Cal 'ora tocomma eteħnufila' afane', anuli aiquepalc'o'. Jouc'a cal mut'ła eteħnufila' afane'. Anuli aiquepalc'o', oque' epalc'ola'. Jouc'a lan xamna, ja'ni anuli aiquepalc'o' oque' ti'hua tepalc'ola'. Tofta'a ma micohi litine amalpuj hora i'ipa pangay muf. Ma' anuli lipuqui'. Tipa'a amalpuj hora joupa imufc'opa, aiquepalc'ola' cal mut'ła ni lan xamna.

¹³ Lijou'ma aixim'ma anuli cal cui tiyu lema'a. Tiyu małpe pe lo'iyoya cal 'ora menac'o. Aicuejpa loya'apa, ticua: "Aijc'a lo'iya, aijc'a lo'iya, aijc'a lo'iya. Linca acuanuc'la lan xanuc' nomana' li'a łamats'. Muna'me liħtrompeta locuenaye lam fantsi łapaluc' quema'a acueca' juaiconapa lo'eyacola' lan xanuc', acueca' titełco'me."

9 Łocuena łapaluc quema'a tunay litrompeta. Joupa i'ipa amajxi nunapá. Aiximpa anuli cal xamna joupa ecangeyomma lema'a icuai'ma li'a łamats'. Hque cal xamna epi'impá liyahui al cuecaj pu'hua cuftine al Abismo. Jiłpiya timana' lontahue. ² Exi'e'ma al cuecaj pu'hua. Lijoupa lexi'epa tif'aqui ĩpicuxis ti'onłcospa to ĩpicuxis al cueca' capa. Hque ĩcuxis tipa'ne cal 'ora, imufc'o' li'a

łamats'. ³ Małpe ĩcuxis tipalumma lan xa'mut'ł. Ni petsi li'a łamats' icuaiyunca iħniya lan xa'mut'ł.

Epi'impola' liħmane ti'ete to lo'epa linnaispo lomana' li'a łamats'.

⁴ U'im'mola': "Ma le'a toftełmitsola' lan xanuc' petsi aiquiłtaic' ĩlepalı lisello ŁanDios. Al pajac, jouc'a laxhuaica lilapola, jouc'a cal ec', aimołteł'mi'mola' iħna'a."

⁵ Tofta'a iħniya lan xa'mut'ł epi'impola' liħmane titeł'miħe lan xanuc' petsi aiquiłtaic' ĩlepalı lisello ŁanDios. Lan xa'mut'ł aimima'a'me, ma titeł'mi'me. Amaque' mut'ła ti'hua titeł'mi'me lan xanuc', tummi'i'me ĩłpitac'. Anuli anuli iħiya lipitac tumlej'ma to lipumla lipitac ĩnnaispo. ⁶ Iħniya ĩtiné lan xanuc' notelcópá tofta'a tehue'me te co'iya mimayacola'. Aimixinyacu. Aimi'iya mimayacola'.

⁷ Iħniya lan xa'mut'ł ti'onłcospola' to laiħuale joupa itats'empola' tiye'me lafuleya. Iħtaic' ĩłjuac tocomma acorona lilanc'ecompa a'oro. Li'ła ti'onłcospa to li'a cal xans. ⁸ Liłjuac ti'onłcospa to liłjuac lacał'no', li'ay ti'onłcospa to li'ay calxmu. ⁹ Iħtaic' liħcoraza tocomma to lilanc'ecompa atejma'. Liłxala' tuna'e' to lona'apa axpej carro minul'me, to mexat'ħu'me laiħuale tinulyi tıfuleta. ¹⁰ Tipa'a liłpo ti'onłcospa to lipo ĩnnaispo, itaic' lipitac titeł'mico'me lan xanuc'. Ti'hua titeł'mi'me lan xanuc' amaquej mut'ła. ¹¹ Tipa'a ĩħrey ticuxela'. Hque epaluc al cuecaj pu'hua. Lipuftine ataiqui' hebreo ticua: Abadón. Ataiqui' griego ticua: Apolión. He laftine lohualquemma tuya'e': Hque tejac'eyale.

¹²Tołta'a lilełcopa lan xanuc' lunapa litrompeta łapaluc quema'a, iłque cal majxi. Tehue'e' locuenaye oquexi' łapaluc' quema'a tunate litrompeta, titełcocona'me lan xanuc'.

¹³Locuena łapaluc quema'a tunay litrompeta. Joupa i'ipa acamts'us nunapá. Aicuej'ma tipalquinni. He lataiqui' qui'huayomma jilpe lam malpu' liju' al altar lilanc'ecompa a'oro, ihiya al altar ehuoc'ocojma pe lopa'a łanDios. ¹⁴Tipalaic'o łapaluc quema'a ts'i'nohi litrompeta, iłque cal camts'us, timi: "Tox'mastsola' lam maluxi' capaluc' quema'a iłne lifingotila' jilpe al cuecaj pana' cuftine Éufrates".

¹⁵ŁanDios joupa ixpic'epa tej hora, te quitine, te mut'ła, te camats' tux'mas'mola' iłniya łapaluc' quema'a. Iłne ti'huaicoyi. Itsiya joupa ixhuaita al 'hora. Ux'masquim'mola' tima'antsola' lan xanuc'. Aimima'anyacola' jahuy. Petsi tima'a'me anuli timanecu ts'iłmaf'i' oquexi'. ¹⁶Iłne łapaluc' quema'a timana' liłsoldado ilenafcołaic' laihuale. Uya'am'me tojua mimana', aicuej'ma. Timana' oquej maxnu millón.

¹⁷Tołta'a lałmuc'ipa łanDios. Aixim'mola' laihuale jouc'a nocutsafcołanna. Iłniya iłjojma liłcoraza. Timana' iłjojma liłcoraza unxali to łunga, jouc'a petsi iłjojma umi azul, jouc'a iłjojma ata'enca to łazufre. Liłjuac laihuale toco'ma to iłjuac lanxmuhua. Liłco tipamma cunga, quicuxis, jouc'a łazufre. ¹⁸Iłe laipayomma liłco laihuale, ihiya łunga, łicuxis jouc'a łazufre ima'a'mola' lan xanuc'. Pe

lima'am'me anuli timanecu oquexi' ts'iłmaf'i'. ¹⁹Iłniya laihuale liłpo tipa'a iłjuac to iłjuac łainofał. He iłjuac tipa'a liłco ticaconnilla' lan xanuc'. Tołta'a acueca' lo'epa iłna'a liłco quilpo, titeł'miyaley i juaiconapa.

²⁰Lan xanuc' lomanemma ts'iłmaf'i', iłniya petsi aikuima'ala' łunga ni łicuxis ni łazufre, iłniya aikuilseuj'meya li'epa. Aiquilnesqui: "Ał'epa a'ijc'a. Ałanc'epola' lalandiosla'." Iłne lan xanuc' ti'hua tihuejyi lontahue. Ti'hua texc'onhingołaiyi landiosla' lilanc'ecompola' a'oro, aplata, abronce, apic o a'ec. Iłna'a lacui'impola' landiosla' aimi'iya mixinyacu, aimi'iya miquimfeyacu, aimi'iya miyeyacu. ²¹Jouc'a ti'hua tima'ahualeyi, ti'hua tilotsocoyołtsi, ti'hua tehueyi quilecał'no', ti'hua tinantseyi. Iłne aikuilseuj'meya li'epa tołta'a.

10 Aixim'ma ocuena capaluc quema'a, xonca ipujfxi, timuyomma lema'a. Iju'icoya cummahuy. Tipo'nof'iya iłjuac anuli lupaje. Li'a ti'onłcospa to cal 'ora tunts'ifqui. Li'mitsi' tocomma to lipał cunga to munaj'ma al puc'o c'ec. ²I'nohi limane to la'hua je'e uxmalai'f'quiya. Al c'a camane li'mis tecaxc'o łaja, lipoxa camane qui'mis tecaxu łamats'. ³Ipalai'ma ujfxi tocomma to mija'a'ma calxmu. Lipalai'ma jouc'a una'a'mola' lan caitsi quetumi. ⁴Luna'apola' lan caitsi quetumi coła' quini'ma loya'apa iłniya. Aicainiñi. Aicuej'ma tipalay anuli nopa'a lema'a. Ałmi: "Aimainiłijm'ma linespa lan caitsi letumi. Aimo'itola' lan xanuc'."

⁵Lijou'ma łapaluc quema'a, małque łaiximpa tecaxc'o łaja tecaxu łamats', inif'ma al toncay al c'a quimane, enas'ma lema'a. ⁶Icuaj'mi'ma lipuftine Ľimaf'i CanDios, iłque aimimaya, małque Nilanc'epa lema'a y jahuay lopa'a jilpiya. Jouc'a ilanc'epa li'a łamats', łaja y jahuay lopa'a. Ticua łapaluc quema'a: "Aimicołconaya. ⁷Ai'a tuna'a'ma litrompeta Ľijoujma capaluc quema'a, iłque cal caitsi, ti'i'ma to loya'apa lemiya cataiqui' iłe lonescopa lixp'ic'epa ĽanDios. Ľe lataiqui' ĽanDios joup'a u'ipola' liprofeta, iłniya no'epá lipenic' iłque ĽilPoujna."

⁸Iłque tipalay jilpe lema'a joup'a aicuej'ma tipalqui. Małque ałpalaic'oconapa, ałmi: "To'huata'. To'nołta al je'e loxmalai'f'quiya jilpe limane łapaluc quema'a, iłque tecaxc'o łaja tecaxu łamats'." ⁹Ai'huahuo'ma. Cacuaitsi pe lopa'a łapaluc quema'a, cami: "Ałni'ila' la'hua je'e". Ałmi: "To'nołta', totela'. Moteja toxim'ma ani'i to al cujua. Ticuaitsi locu'u ti'i'ma acuá." ¹⁰Ai'noł'ma la'huaj je'e lopa'a limane łapaluc quema'a. Ai'nico'ma laico, aite'ma. Laico i'i'ma ani'i to al cujua. Lijou'ma lainuc'ma laicu'u i'i'ma acuá. ¹¹Lijou'ma ałmim'ma: "Toya'acona'ma loxp'ic'epa ĽanDios. Tonesco'mola' lan xanuc' ituca' ituca' Ľilelołya', ituca' ituca' liłnación, ituca' ituca' liłtaiqui'. Jouc'a topalaico'mola' axpela' lan rey."

11 Ałnim'ma al jaxa to al 'ec loxp'ijcompa. Ałmi: "Totsahuenni. Toxp'ijta lipaxi quejut'ł ĽanDios. Toxp'ijta jouc'a jilpe al altar lopi'eyompa

łipac'ec. Toxhuej'metola' jilpiya laxc'onłingołanna. ²Ľipuna jilpe lipaxi quejut'ł ĽanDios aimoxpijta. Ľuna a'ij paxi, iłe ił'huexi locuenaye lan xanuc'. Ľniya tetets'i'me al Paxi Quiłya', ticuxenai'i'me lixanuc' iłe liłya' oquej nuxans coquej mut'ła. ³Oquexi' laixanuc' łapalaicopa iya', capi'i'imola' quilmane tuya'a'me laitaiqui'. Tipo'no'me liłpijahua' umi. Ľbamaj coquej maxnu afanej nuxans quitiné tuya'a'me al cueca' laixpic'epa ca'e'ma."

⁴Ľniya ti'onłcospola' to loque' lan 'ec' olivo, jouc'a ti'onłcospola' to loque' lepalc'o lacaxołanna pe lopa'a ĽanDios iłque aPoujna jahuay li'a łamats'. ⁵Ja'ni naitsi tixpic'eł'a' tixcai'etsola' iłniya loquexi' lan xanuc', tipahuo cunga liłco, iłque łunga tima'a'ma no'eya lixcay. Tołta'a titeł'mim'mola', tima'am'mola' petsi naixtuc'opá. ⁶Ľniya loquexi' lan xanuc' epi'impola' liłmane teti'i'me lema'a, aimicuiconaya. Ľitiné muya'ayi iłiya lixp'ic'epa ĽanDios, muya'ayi lo'eya, jahuay iłne liłiné aimicuiconaya. Jouc'a epi'impola' liłmane tipai'ile łaja', ti'ila' ajuats'. Jouc'a titeł'miłe łamats', tep'i'inte ni tintsu cuana. Ľniya, litine tixpic'ełe ti'ełe tołta'a, ti'i'ma ti'e'me, tijouł'a' ti'econa'me.

⁷Ľniya loquexi' nopalaicopá Jesucristo, tijou'nela' loya'apa ticuaihuo cal Cuecaj Quinneja łaipayomma al cuecaj pu'hua lacui'impa al Abismo. Ľe Ľinneja tifule'ma, tulij'mola', tima'a'mola'. ⁸Liłcuerpo timanecu jilpe łaneya al Cuecaj Quiłya'. Jilpe liłya' jouc'a tecui'inni liłya' Sodoma, o łamats' Egipto. Lixanuc' lił'ejma'

ti'onłcospa to li'ejma' lan xanuc'
nimajmpá li'ya' Sodoma jouc'a
łamats' Egipto. Małpiya li'ya' jouc'a
ima'a'me łalPoujna, epałts'ijmpa
lancruz. ⁹Jilpiya timana' lan xanuc'
quiyouyomma ni petsi li'a łamats',
ituca' ituca' liłtatahueló, ituca' ituca'
liłtaiqui', ituca' ituca' liłnación.
Iłniya lan xanuc' afane' quitine y
onłca tehuelojnyi iłniya nomapola'.
Ticua: "Aimalapi'iyacola' lane
meminyacola'". ¹⁰Lan xanuc' nomana'
li'a łamats' tixoc'iyoltsi quileta.
Ti'eyi liłjuic, tepi'iyoltsi. Ticuayi:
"Joupa imapola' iłniya loquexi' lam
profeta. Aimałte'miconayaconga'.
Aimałmiconayaconga': Tołta'a
lixpic'epa ŁanDios."

¹¹Tijoutsu lam fane' quitine y
onłca ŁanDios imaf'i'ina'mola' iłne
loquexi' nomapola', ecaxołcona'me.
Petsi nehuelojmpá ixpailij'mola'
juaiconapa. ¹²Iłne loquexi'
limaf'i'ınapola' icuej'me tipalay ujfxi
pu'hua lema'a, timila': "Tołf'ajcunca
fa'a". Ma mehuelojnyi naixtulepá
anuli łummahuay if'ac'e'mola'
lema'a. ¹³Małe 'hora inu'ma
acueca' cunanto. Etełnufipa li'ya'
imbama'. Anuli ecangenni. Iłque
łunanto ima'a'mola' acaitsij mil lan
xanuc'. Petsi nomanemma ts'iłmaf'i'
iłniya ixpailij'mola' juaiconapa.
Imetsaicoco'me ma' acueca' ŁanDios
Nopa'a lema'a. ¹⁴Tołta'a lilełcopa lan
xanuc' luna'apa litrompeta łocuena
łapaluc quema'a, iłque cal camts'us.
Tehue'e' łocuena'ya łapaluc quema'a
tuna'ałá' litrompeta, titełcocona'me
lan xanuc'. Ite lo'iya aimicołya.

¹⁵Łocuena łapaluc quema'a tunay
litrompeta, iłque cal caitsi. Jilpe
lema'a tipalaiyinni ujfxi, ticuayi:

"Itsiya i'ipa, itsiya łalanDios y
iCristo ticuxeyi jahuay li'a
lamats'.

Cristo ti'hua ticuxe'ma,
aimijouya locuxeya."

¹⁶Lan nuxans malujxi' lan tsilaj
xanuc' nomana' lehuoc'ocojma
ŁanDios ticutsołanna. Anuli anuli
ticutsu lipexpats'qui li'nofquiya,
jahuay iłniya ixpats'ołai'me,
imetsaico'me ŁanDios cal Cueca'
Xonca. ¹⁷Timiyi:

"Ima' manDios, ima' małPoujna,
ima' xonca uncueca', tocuxe
jahuay.

Ima' ma' itsiya topa'a, topa'a
li'ipa.

Itsiya ałs'najtsi'ihuo', ima'
ałmuc'iponga' acueca' lomane,
tocuxe jahuay.

¹⁸Lan xanuc' pe aikuimetsaicohuo'
tixtuc'ohuo', icuai'ma litine
toteł'mi'mola'.

Limanapola' tefot'le'moltsi pe
lołpa'a ima' iłJuez, tepi'i'mola'
liłjunac'.

Jouc'a lam profeta iłne ni'epá
loopenic' ima' iłPoujna,
tapi'i'mola' lolijyacu.

Ma' anuli tapi'i'mola' loxanuc'
iłne o'huexi ima', małne
petsi naihuejcopo' tapi'i'mola'
lolijyacu.

Ja'ni lan tsocay, ja'ni lan tsilaj
xanuc', tapi'i'mola' lolijyacu.
Petsi netełpa łamats'

toteł'mi'mola' tejac'em'mola'."

¹⁹Exi'em'me al Paxi Lugar pu'hua
lema'a pe lołpa'a ŁanDios. I'huáqui
jilpiya al caxax. Jilpe al caxax
ipo'nompa lapic' linilingiya lataiqui'
lixpic'epa ŁanDios lo'eyacu lixanuc'.
Małe 'hora ipango'ma tixcaflay,

iquimf'em'me tipalquinni, tunalequi. Inu'ma ñunanto. Juaiconapa icui'ma qui'ay cacui.

12 Lijou'ma i'huájtsi jilpe lema'a acueca' y xpaiqui'. Jilpe imaxcaita anuli ñaca'no', ijui'icoya ñipepañ cal 'ora. Cal mut'ña tipa'a al 'ocay li'mitsi'. Lijuc tipa'a licorona imbamaj coque' lan xamna. ²Innay ñaca'no'. Joupa tumlec'o, tipo'no'ma hi'hua. Tija'e'. ³Lijou'ma i'huájtsi jilpe lema'a ocuen'aya acueca' caxpaiqui'. Ipiya tipa'a anuli cal cuecaj coyac' quinneja to cal cuecaj caimu. Tipa'a ñixala'. Ñinneja cuftine cal Dragón. Iñque cal dragón unxali to ñunga. Tipa'a acaitsi ñijuac, imbama' ñipecala'. Lijuc tipa'a acaitsi lan tsocay quicorona. ⁴Lipo texat'ñucola' lan xamna nomana' lema'a. Afantsi lan xamna texat'ñuhua anuli. Teca'nila' ñamats'.

Cal dragón ecaxingai'ma ñaca'no' nopo'noya qui'hua. Tipajntsi hi'hua tite'ma. ⁵Ñaca'no' umof'ma. Ipajntsi hi'hua amijcano. Iñque ticuxe'mola' lan xanuc' nomana' li'a ñamats'. Ipujfxi ticuxe'mola'.

Li'hua ñaca'no' exic'e'empa, ilecom'me al toncay lema'a pe lopa'a ÑanDios, ilecom'me jilpe pe lopa'a lexpats'qui li'nof'quiya. ⁶Ñaca'no' inu'ma pe ailopa'a quiñya'. Jilpe ÑanDios lilanc'epa lopanc'eya. Tipajnta imbamaj coque maxnu afañej nuxans quitine. Jilpe tites'minna.

⁷Lijou'ma jilpe lema'a aixim'ma lipango'ma al cuecaj cafuleya. Cal cuecaj capaluc quem'a cuftine Miguel y li'as capaluc' quem'a jouc'a cal dragón y

lipontahue tifuli'iyoltsi. ⁸Cal dragón y lipontahue ailopa'a quiñpujfxi, aiculij'me. Ipiya lema'a aimimajñconayacu. ⁹Ipa'am'me jilpiya cal cuecaj dragón, ñainofañ nopa'a al te'a. Iñque ñecui'impa loque' lipuftine: Ñonta'a, jouc'a Satanás. Tifel'mila' lan xanuc' ni petsi nomana' li'a ñamats'. Iñe cal dragón y lipontahue eca'nim'mola', icuaitsa li'a ñamats'. ¹⁰Aicuej'ma tipalquinni ujfxi jilpiya lema'a, ticua:

“Iñsiya ñinca imuj'moxi
nulemma ñalanDios, mañque
Ñalunñu'eponga', iñque acueca'
lo'epa, ticuxe.

Jouc'a hiCristo imuj'moxi icueya
limane.
Joupa eca'nimpa ñonta'a Satanás,
ticufñquila' lapimaye.
Ipuqui' itine tipalaic'o ÑanDios,
ticuxecola'.

¹¹Ña'huaj Moñ joupa ixcuajaipa
lijuañts', toñta'a lapimaye joupa
ulijpá.

ÑanDios aiqiquimf'e
lonescopola' ñonta'a.
Joupa ilaitsufcola' iñe nuya'apá
litañqui',
iñe aiqixim'me acuanuc'
liñpitine, icu'moñtsi,
ima'am'mola'.

¹²Tixojla' cunlata jahuay imanc'
noñmana' lema'a, jilpiya
ailopa'a ñonta'a y lipontahue.
Ñinca ituca' lo'iyoya ñamats' y ñaja.
Jilpiya ti'i'ma acueca' lateñcoya,
ñonta'a joupa imumma,
juaiconapa tixtu'hua, ixina'
ahuata ticoñma.

¹³Cal dragón liximpxi joupa
ecangemma, tipa'a li'a ñamats',

ipango'ma ihuejtsoj'ma łaca'no',
iłque nipo'nopa łamijcano.

¹⁴Ipo'no'im'me łaca'no' oque' łixala'
to łixala' cal cuecaj cui, tiyuła'
pe lopanc'eya, jilpiya pe ailopa'a
quiłya'. Jilpe tites'minni afanej y
onłca camats'. Łainofał aimixinya.

¹⁵Lixpula' łaca'no' inacafipa caja'
łainofał, tocommma acuecaj pana',
ticua: "Ihiya al pana' nulemma
tinus'ma łaca'no'". ¹⁶Łamats'
itoc'i'ma łaca'no'. Epanni łamats',
inuc'ma laja' laipamma lico łainofał.

¹⁷Cal dragón, ixtuc'o'ma łaca'no'.
I'hua'ma ehuetsole' locuenaye
linaxque' łaca'no', iłne nocuec'epá
locuxepa ŁanDios, tuya'ayi litaiqui'
Jesús, ihuej'me iłque.

¹⁸Cal dragón ecaxhuai'ma łema
caja.

13 Aixim'ma anuli cal cuecaj
coyac' quinneja ipamma
jilpe łaja. Tipa'a acaitsi hijuac,
imbama' łipecala'. Łipecala' timana'
imbama' lan tsocay corona. Anuli
anuli hijuac iniłingiya anuli laftine.
Iłne łaftine tetets'iyi ŁanDios.

²Iłque cal cuecaj coyac' quinneja
łaixim'ma ti'onłcospa to cal tigre.
Li'mitsi' ti'onłcospa to li'mitsi' cal
oso, lico ti'onłcospa to lico calxmu.
Cal dragón łacaxuya łema caja
epi'i'ma acueca' quimane cal cuecaj
coyac' quinneja. Tepi'i' lane ti'i'ma
ti'e'ma al cueca', a'ujfxi ticuxe'ma.

³Aixim'ma cal cuecaj coyac'
quinneja anuli hijuac tocommma
imac', to ima'acompa acutsilo.
Lijou'ma lixcaipa ixałconapa,
imaf'ina'pa ihiya hijuac. Jahuay
lan xanuc' nomana' li'a łamats'
ticuayi acueca' li'ipa cal cuecaj
coyac' quinneja, tihuejyi.

⁴Texc'onłingołaiyi cal dragón, iłque
łepi'ipa limane cal cuecaj coyac'
quinneja. Jouc'a texc'onłingołaiyi
cal cuecaj coyac' quinneja, ticuayi:
"Ailopa'a co'onłcoya cal cuecaj
quinneja. Aimi'iya mulijyacu."

⁵Cal cuecaj quinneja epi'im'me
lane tipalaıta' atsilaj cataiquı,
tinesla' latets'icopa ŁanDios.
Epi'impa lane ticuxe'ma oquej
nuxans coque' mut'ła. ⁶Ipango'ma
inesc'e'ma ŁanDios. Tetets'i
lipuftine ŁanDios, tetets'i pe lopa'a
ŁanDios, tetets'ila' nomana' jilpe
lema'a. ⁷Epi'impa lane tifuli'itsola'
lixanuc' ŁanDios, iłniya i'huexi
ŁanDios, tulij'mola'. Epi'im'me
limane ticuxetsola' jahuay
locuenaye lan xanuc', iłne ituca'
ituca' liłtatahueló, ituca' ituca'
liłtaiqui', ituca' ituca' liłnación.
⁸Iłniya lan xanuc' nomana' ni
petsi li'a łamats' texc'onłingołai'me
cal cuecaj quinneja. Iłniya petsi
naxc'onłingołaiyacu liłpuftine
aiquiniłingiya lije'e Ła'huaj Moł.
Iłque Ła'huaj Moł liłajmpa li'a
łamats' tocommma to joupa ima'ampa,
itsufcompa.

⁹Naitsi nocuejpa tiquimf'ela'
lataiqui' loya'apa: ¹⁰"Ja'ni
joupa ixpic'empa titats'entso'
o tima'acontso' acutsilo, ma
titats'enno', tima'aconno' acutsilo".

Mitelcoyi tołta'a iłne petsi
i'huexi ŁanDios, iłniya timujyołtsi
ti'huaiyijnyi ŁanDios, tixnet'i'me.

¹¹Aixim'ma ocuena cal cuecaj
coyac' quinneja, tipayomma
łamats'. Tipa'a oquej łipecala' to
łipecala' ła'huaj moł. Tipalay to cal
dragón. ¹²Tipa'a acueca' limane
to limane cal te'a' cal cuecaj

coyac' quinneja. Mehuelonge cal te'a' quinneja ma' anuli lo'epa łocuena. Ticuxela' nomana' li'a łamats' texc'onlingołaihe cal te'a cal cuecaj coyac' quinneja, iłque lixałconapa lixcaipa, imaf'ınapa. ¹³Timuc'ila' lan xanuc' al cueca' lo'epa. Tijoc'i' tecangenni łunga lema'a, ticuaiyunni łamats'. ¹⁴Lijoupa lepi'icompa limane ti'eł'a' al cueca'. Tołta'a' ti'ay ma mehuelonge hi'as quinneja. Tifel'mila' lan xanuc' nomana' li'a łamats'. Timila': "Tołanc'ełe anuli łolandios, ti'onłcota to iłque cal cuecaj coyac' quinneja. Iłque ima'acompa acutsilo, ijou'ma imaf'ına'ma." ¹⁵Ilanc'epá łilendios. Lijou'ma epi'impá limane łocuenaj cal coyac' quinneja timaf'i'ila' łilendios, tipala'ıta', ticuxeł'a'. Ticua: "Petsi aimexc'onhingołaiyi cal cuecaj coyac' quinneja tima'antsola".

¹⁶Łocuena quinneja ticuxe'ela' jahuay lan xanuc' tepenufle quılseña al c'a quılmane o łilepali. Ticuxe ti'e'entsola' jahuay lan xanuc', lan tsocay jouc'a lan tsila', petsi ts'ıl'hueca jouc'a petsi aiqııl'hueca, petsi ailopa'a quılpojuna, ti'eyi canic' quıltauca', jouc'a lam mozó iłne tipa'a hıłpojuna. Ma' anuli ipo'ninc'e'em'mola' quılseña. ¹⁷Iłe liłseña tepi'ila' lane ti'na'me, ticuj'me. Petsi ailopa'a quılseña aimi'ıya mi'najacu, aimi'ıya micujyacu. Iłe al seña ipuftine cal coyac' quinneja o łinúmero.

¹⁸iTołcuc'ełe! Naitsi iłque ts'ıpicuejma' tixhuj'meł'a' łinúmero cal cuecaj coyac' quinneja. Iłe al número inúmero xans, a'i quinúmero ŁanDios. Acamts'us

maxnu afanej nuxans camts'us, 666, iłe łinúmero cal cuecaj coyac' quinneja.

14 Lijou'ma aixim'mola' Ła'hua Moł jouc'a anulij maxnu oquej nuxans malujxij mil lan xanuc' tecaxhuołanna jıłpe hıjuala cuftine Sıón. Iłne lam maxnu oquej nuxans malujxij mil lan xanuc' tinihıjnya łilepali iłtaic' lipuftine Ła'huaj Moł jouc'a lipuftine qui'Aılli'. ²Aicuej'ma jıłpe lema'a petsi lonapa li'harpa. Aicuej'ma tuna'e' juaiconapa to mipahuo laja' axpe' cal panay o to muna'a'ma łetumi. ³Iłne petsi nonapá li'harpa timana' jıłpe lehuoc'ocojma' lexpats'qui li'nof'quiya, lehuoc'ocojma' pe lomana' lam malujxi' lam paxi quinneja, lehuoc'ocojma' pe lomana' lan tsilaj xanuc'. Jıłpe tunac'yi al ts'e canción, ituca'. A'i jahuay lan xanuc' mihuic'ıyacu iııya al ts'e canción. Tihuic'i'me ma le'a lam maxnu oquej nuxans malujxij mil lan xanuc', iłne li'napola' ŁanDios, i'epola' ixanuc'. ⁴Iłne aiqıılıxs'mecoyołtsi, aiqıılıhuequi lacał'no'. Ti'onłcospola' to lamıjcanó, ma tıhuejyi Ła'huaj Moł ni petsi lotseya. I'napola', joupa ixanuc' ŁanDios. Aimi'onłspola' to locuenaye lan xanuc' nomana' li'a łamats'. ŁanDios jouc'a Ła'huaj Moł epenuf'mola' to cal te'a hıpammaita litsufcompa. ⁵Iłniya aimifel'mıyaleyi. Tinesyi ma le'a al łınca. Ailopa'a quıljunac'.

⁶Aixim'ma anuli łapaluc quema'a tıyu małpe locuaiya cal 'ora ti'ıla' menac'o. Iłque tuya'e' Lataiqui' loya'apa iłe al c'a lixpıc'epa ŁanDios. Małe Lataiqui' aimıpaıcoya. Tuya'e'

ticuejle jahuay lan xanuc' nomana' ni petsi li'a lamats'. Ihe lan xanuc' ituca' ituca' lihnación, ituca' ituca' lihtatahueló, tipalayi ituca' ituca' lihtaiqui', ituca' ituca' lihpitelolya'.
 7 Lupaluc quema'a tipalay ujfxi, timila': "Imanc', tolimetsaicolé LanDios. Tołmife: Ma' ima' cotuca' manDios. Joupa icuai'ma litine, tipango'ma lipenic' cal Cuecaj Juez. Ique ilanc'epa lema'a, li'a lamats', łaja, jouc'a ilanc'epa laipayomma łajay. iTolaxc'onłingołaiel!"

8 Ihuequi łocuena capaluc quema'a ticua: "Al cuecaj quitya' Babilonia joupa ecangemma nulemma etelquemma. Liłya' ti'onłospa to łixcay caca'no', tifel'mila' lan xanuc' ni petsi lihnación. Ihe lan xanuc' tihuejyi to lamac'ta quisnaye. Linca LanDios joupa itel'mipa liłya'."

9-10 Tihuequi łocuena capaluc quema'a, ł'icoya afantsi. Tipalay ujfxi, ticua: "Lan xanuc' joupa exc'onłingołaipá cal cuecaj coyac' quinneja jouc'a cal imagen lilanc'epa lan xanuc'. Ique cal imagen lo'onłospa to iłque linneja. Małniya lan xanuc' nexc'onłingołaipá tołta'a iłtaic' liłepali o liłmane quitseña. Iłniya a'i munłu'enyacola'. Tixim'me ma tixtuc'ola' cal Cuecaj CanDios. Aimixinyacola' acuanuc'la. Titeł'mico'mola' ipał cunga y azufre. Lam paxi capaluc' quema'a jouc'a Ła'huaj Moł tixinim'mola' mitełcoyi. Aimitoc'inyacola'. 11 Iłpiya lotelcoyopa iłe łunga liłpicuxis ti'hua ti'f'acui, aimipica łunga. Petsi notelcopá jilpiya aimunxajyi, ipuqui' itine ti'hua titełcoyi. Tołta'a titełco'me petsi naxc'onłingołaipá

cal cuecaj coyac' quinneja, jouc'a naxc'onłingołaipá cal imagen, iłque lo'onłospa to iłque linneja. Małniya lan xanuc' epenufpa liłseña, iłe linúmero cal cuecaj coyac' quinneja." 12 Linca lixanuc' LanDios, iłe li'huexi, ituca' lo'eyacu. Ihe tihuejcoyi locuxepa LanDios, ti'hua ti'huaiyijnyi Jesús.

13 Aicuej'ma anuli tipalay jipu'hua lema'a, ałmi: "Tainiłła' laifmipo': Itsiya ipangocopa tixoj'ma quileta jilne limanapola' mi'huaiyijnyi łalPoujna Jesús." Cal Espiritu Santo ticua: "Al linca locuapa. Ihe aimi'econayacu canic'. Tunxajyi. LanDios ti'njuuaitisila' al c'a li'epa mimana' li'a lamats'."

14 Ma cahuelonge aixim'ma anuli cal fujca cummahuay. Jilpe łummahuay ticutsafya anuli ti'onłospa to cal xans. Iłpe lijuac itaic' licorona ilanc'ecompa a'oro. Limane inic' li'hoz juaiconapa ix'ay. 15 Łocuenaj capaluc quema'a quipayonni al paxi quejut'ł LanDios. Tipalay ujfxi. Tipalaic'o łocutsafya łummahuay, timi: "Iłpe lamats' tacanc'ola' lo'hoz. Tatejla' cal trigo. Cal trigo łopa'a li'a lamats' joupa unta'amma, ixhuaita litine cafot'łeya, tatejla'." 16 Łocutsafya łummahuay tecanc'o' li'hoz, tetequi cal trigo łopa'a jilpiya li'a lamats'.

17 Ipanni łocuena capaluc quema'a qui'huayomma al paxi quejut'ł LanDios, iłe łajut'ł łopa'a lema'a. Jouc'a inic' li'hoz juaiconapa ix'ay. 18 Łocuena capaluc quema'a ipanni jilpe pe łopa'a al altar. Ique łupaluc quema'a ticuxe łunga. Tipalay ujfxi, tipalaic'o li'as capaluc quema'a, iłque inic' li'hoz. Timi: "Tacanc'ola'

lo'hoz, ihe ix'ay. Tatejla' hixcala' uva lopa'a jilpe li'a lamats'. Joupa imajpa.”

¹⁹Łapaluc quema'a tecanc'o' li'hoz jilpe li'a lamats'. Tetequi iĥne hixcala' uva, tefot'le lan uva, ti'nij'mi jilpiya al cueca' loxojyoya, tipa'am'me lijya'. Jilpiya loxojyoya timuj'ma lipoyac' ŁanDios. ²⁰Tipa'a lema quilŷa' petsi loxojyoya lan uva. Iĥpe i'huailejyompa. Ipanni lajuats' to al cuecaj pana'. Lipitoqui linu'ma iĥiya lajuats' tixhuaispa anulij mil acamts'us maxnu estadio. (Iĥiya al estadio loxpijcopa lan xanuc' mimana' iĥniya ĥitiné. Anulij mil acamts'us maxnu lan estadio tixhuaispa to oquej maxnu malpuj nuxans paico lan kilómetro.) Lipiculhuo iĥpe lajuats' tuntsac'aispa liĥco laiĥuale.

15 Aixingona'ma iĥe al cueca' caxpaiqui' jilpe lema'a. Timana' acaitsi lapaluc' quema'a iĥtaic' lan caitsi catelcoya. Iĥne lijoucola' latełcoya. Tijoutsola' iĥna'a latełcoya, ŁanDios joupa ixhuai'nipa lipoyac'. ²Aixim'ma tocomma to łaja ilanc'ecompa apulu ihuants'i' cunga. Iĥpe łaja lilanc'ecompa apulu tecaxołanna lan xanuc' nulijpá cal cuecaj coyac' quinneja. Iĥne aikuexc'onłingolai'me cal imagen lilanc'epa lan xanuc', iĥque ti'onłocspa to ĥinneja. Iĥne aikuilŷtaic' quilŷeña. Iĥe al seña inúmero cal cuecaj coyac' quinneja. Tuya'e' te ts'i'ic' lipuftine. Iĥtaic' li'harpa lepi'ipola' ŁanDios. ³Tunac'yi iĥiya lunac'pa Moisés, iĥque i'epa lipenic' ĥiPoujna ŁanDios. Iĥe al canción ma' anuli licanción Ła'huaj Moł. Timiyi ŁanDios:

“Acuecaj y xpaiqui' lof'epa ima' malanDios.

Ima' małPoujna, ima' unCuecaj, tocuxela' jahuay lan xanuc'.

Ima' to'ay ma le'a al c'a, ma le'a al ĥija.

⁴ ŁJa'ni tipa'a petsi

aimixpaic'eyaco'?

ŁJa'ni tipa'a petsi aimixinyaco' unCuecaj, ima' manDios?

Ailopa'a.

Linca ma' ima' cotuca' umPaxi, omujpoxi ac'a, aĥijca lofxcpic'epa.

Jahuay timetsaicoco'mo', textc'onłingai'mo'.”

⁵Lijou'ma aixim'ma jilpe lema'a

exiya al Paxi Lugar pe lopa'a

ŁanDios. Jilpe ti'onłocspa to

li'ĥuec'empa lan tsilaj capic'

liniĥingimpola' łataiqui' loya'apa

locuxepa ŁanDios. ⁶Jilpe al Paxi

Lugar ipalunca acaitsi lapaluc'

quema'a. Iĥne lan caitsi lapaluc'

quema'a epi'impola' liĥmane

titeł'mim'mola' lan xanuc'. Liłpijhua'

lilanc'ecompa alino afujca,

aicunxalaic'. Tipa'a ts'iłfi'ejma

ĥilunxajma', ilanc'ecompa a'oro.

⁷Anuli lam malujxi' lam paxi

quinneja tepi'ila' lan caitsi capaluc'

quema'a quilŷtaza lilanc'ecompa

a'oro. Iĥne lan taza imanna lipoyac'

ŁanDios. Iĥque Łimaf'i' CanDios,

aimimaya. (Tixcua'ale anuli anuli

lan taza lan xanuc' tixim'me lipoyac'

ŁanDios.) ⁸Lipalumma lapaluc'

quema'a jilpe al Paxi Lugar, ŁanDios

imuj'moxi ma' anDios, imuj'moxi

acueca' lo'epa. Toliya al Paxi Lugar

imantsi quicuxis. Ma miteł'minnila'

lan xanuc' lan caitsi lapaluc' quema'a,

aimi'ya mitsulfaiconayacu jilpe.

16 Aicuej'ma tipalquinni
ujfxi jilpe al Paxi Lugar.
Timila' lan caitsi capaluc' quema'a:
“Tonfele. Toluhuate loftazá
ihne imanna lipoyac' ÑanDios.
Tołscujajitsa jilpe li'a lamats'.”

²Cal te'a capaluc quema'a ipanni,
ixcujajitsi ilpe lamats'. Lan xanuc'
ts'iltai' liseña cal cuecaj coyac'
quinneja, mañiya nexc'onhingołaipá
cal imagen, ihque ti'onłcospa to
hinneja, ihniya i'i'mola' quilehui,
etefcai'itsola' quixcay cahui acueca'
cumla.

³Łocuena capaluc quema'a
tixcuajay ixcuaf'ipa łaja. Łaja i'i'ma
cajuats', tocomma to ĩmac' xans
lijuats'. Jahuay nomana' jilpe łaja
ima'mola'.

⁴Łocuena capaluc quema'a
ixcuam'ipa cal panay jouc'a
laipayomma łajay. Jilpiya cal panay y
łajay i'i'ma cajuats'. ⁵Aicuej'ma tipalay
łapaluc quema'a nocuxepa łajay, timi:

“Ima' manDios, ima' topa'a itsiya,
topa'a li'ipa.

Ima' alijca lof'epa, alijca
toteł'mila' lan xanuc'.

⁶Hne nima'apá loxanuc' o'huexi.
Ima'a'me loprofeta nuya'apá
lofxcpic'epa.

Ixc'ai'e'me loxanuc', ic'ejai'epa
liłjuats'.

Ima' o'epa łijca, łaja' joupá
ipaicopa, i'ipa cajuats'.

Ihniya tixnałe ihiya lajuats'.”

⁷Aicuej'ma tipalquinni jilpiya al
altar. Timiyi ÑanDios:

“Ima' manDios, ima' alPoujna.

Mane ac'a lof'epa, mane alijca
toteł'miyale.”

⁸Łocuena capaluc quema'a
ixcuaf'ipa cal 'ora. Tołta'a cal 'ora

tipi'e'mola' lan xanuc' to mipi'ennila'
łunga. ⁹I'i'ma quinu' juaiconapa,
ipi'e'mola' lan xanuc', emix'mola'.
Lan xanuc' inesc'e'me quixcay
cataiqui' ÑanDios. Timetsaicoyi ma'
ihque ticuxe'e titeł'mintsola' tołta'a.
Aimilšuej'memmma, ni mimiya
ÑanDios: “Al'epá quixcay. Ima'
manDios, ima' unCueca'.”

¹⁰Łocuena capaluc quema'a,
ihque cal majxi, ixcuaf'ipa pe
łopa'a cal cueca' coyac' quinneja
micutsuya ticuxe. Petsi locuxeyopa
imufc'o'ma, i'ipa muf juaiconapa.
Lan xanuc' jilpe nomana' titełcoyi
juaiconapa. Aimixnet'lyi. Titeji
łilpał. ¹¹Tixinyi acueca' cumla,
acueca' titeł'mila' lilehui. Tohiya
tinesc'eyi quixcay cataiqui' ÑanDios.
Aimilšuej'memmma, ti'hua ti'eyi
quixcay.

¹²Łocuena capaluc quema'a,
ihque cal camts'us, ixcuaf'ipa ilpe
al cuecaj pana' cuftine Éufrates.
Ixnaj'ma łaja'. I'i'ma to lane. Iłpiya
tiye'me lan tsilaj rey naipalyomma
liyuf'ma 'ora.

¹³Lijou'ma aixim'mola' afantsi
lan tałcue. Ihniya ontahue. Anuli
cal tacue ipanni lico cal dragón.
Łocuena ipanni lico cal cuecaj
coyac' quinneja. Łocuena ipanni
lico cal profeta nofelłaiquepa.
(Ihque cal profeta copa'a łocuena
cal cuecaj coyac' quinneja.) ¹⁴Hne
lontałcue ontahue. Epi'impola'
liłmane ti'ełe al cueca'. Tupalumma,
tiyeyi ni petsi li'a lamats', tefot'łela'
lan rey. Ticuaitis al Cuecaj Quitine
ihne lan rey tifuli'i'me ÑanDios. Ma'
ihque cal Cuecaj Ts'ipenic'.

¹⁵“I'Tołcuejle! Litine aimal'huaijma
lan xanuc' iya' cacuaihuo. Ma to

micuaihuo hin-nantsepa tołta'a iya' cacuaiya. Al c'a lo'ya cal xans ja'ni ti'hua timaf'i', ja'ni aimipa'e lipijahuati. Cacuaitsi iya' tixoj'ma queta itque. Ja'ni a'i, ja'ni tixmay, tixim'ma calaic'ata, tixinguf'moxi to amila."

¹⁶Lontahue efot'lem'mola' lan rey petsi cuftine Armagedón. Tołta'a lipuftine ataiqui' hebreo.

¹⁷Łocuenaj capaluc quema'a, itque cal caitsi, ixcua'fipa łahua'. Lijou'ma tipalquinni ujfxi jilpe al Paxi Lugar. Tipalquinni ma jilpe lexpats'qui li'nof'quiya, ticua: "Joupa ixhuaita".

¹⁸Tixcaflay, tunalequi, tija'ayi, inu'ma acuecaj cunanto. Lan xanuc' nomana' li'a łamats' aiquisina' ni anulemma tołta'a cunanto.

¹⁹Łamats' petsi lilajnyopa al cuecaj quiłya' epanni. I'i'ma afane'. Lan tsilaj quiłelołya' lan nación ecangenni, etelquenni nulemma. Ite al cuecaj quiłya' cuftine "Al Cuecaj Babilonia", ŁanDios i'nujuaitsi lixcay li'epa jilpiya. Aiquimenc'ejma. Ticuxe'ela' lan xanuc' tixnałe lopa'a ihiya litaza, tixnałe lipoyac' ŁanDios. Tama aimicuayi, ŁanDios tixnai'i'mola'. ²⁰Jahuay łamats' isla ejac'pola', aits'ihuajtsola' ni anuli hijuala. ²¹Iyuj'ma acueca' qui'ay cacui. Anuli anuli li'ay cacui lipicumta oquej nuxans kilo. Ecangaf'caitsola' lan xanuc'. Ihe ixingufco'me acueca' juaiconapa ite latełcoya, tołiya inesc'e'me quixcay cataiqui' ŁanDios.

17 Icuai'ma pe laifpa'a anuli łapaluc quema'a. Iłque anuli ihe lan caitsi liluhuaic' liłtaza. Ałpalaic'o'ma, ałmi: "Łepá. Camuc'ito' lo'ya łaca'no' xonca cal

xujc'a, małque nocutsafya jilpe łaja. ŁanDios titeł'mi'ma. ²Lan tsilaj rey nocuxepá li'a łamats' ihuej'me łaca'no'. Ihuej'me jouc'a lan xanuc' nomana' ni petsi li'a łamats'. Tijanaj'me juaiconapa, i'ipola' camac'ta to lisnaye."

³Iya' i'huapa laipicuejma'. Łapaluc quema'a ał'hua'e petsi ailopa'a quiłya'. Iłpiya aiximpa łaca'no' ticutsafya cal cuecaj coyac' quinneja. Iłque linneja unxali. Jahuay licuerpo iniłingiya łaftiné. Ihe łaftiné tetets'iyi ŁanDios. Tipa'a acaitsi hijuac, imbama' łipecalá. ⁴Lipijahua' łaca'no' unxali cumi jouc'a unxali. Tipa'a lila'acoyoxi ilanc'ecompa a'oro jouc'a apic' acueca' lipitali, jouc'a aperla. Limane i'nołi anuli al taza lilanc'ecompa a'oro. Ihiya al taza imanna jahuay al xujc'a, ite lo'epa itque cal xujc'a caca'no', imanna jahuay laxits'epa. ⁵Łepali iniłingiya lipuftine, ite ticua: "Iya' ninBabilonia. Nincuecaj quiłya'. Iya' ił'máma' jahuay lacał'no' no'epá quixcay, ił'máma' jahuay iłniya petsi no'epá laxits'epa ŁanDios." Ihe liniłingiya emiya cataiqui'. Ticuicomma tuhuał'inłe.

⁶Aixim'ma imeyojpa łaca'no'. Iłque ima'apola' lixanuc' ŁanDios, ihe i'huexi. Ima'apola' ts'ilihuequi Jesús, noya'apá litaiqui'. Ixnapa liłjuats'.

Laixim'ma łaca'no' ałspaijma juaiconapa. Aines'ma: "¿Te cocuajmaispa ite laiximpa?" ⁷Łapaluc quema'a ałmi: "¿Te coxpajcopo'? Iya' cuhuałc'e'e'mo' ite lemiya cataiqui'. Cami'mo' te ts'ic' lo'ontłospola' łaca'no' y cal cuecaj

coyac' quinneja ts'itaic' acaitsi hjuac, imbamaj lipecala'.

⁸”Joupa oximpa cal cuecaj coyac' quinneja. Małque copa'a luyaipa quitine, itsiya ailopa'a, ticuaiconno, tif'ajyohuo al cuecaj pu'hua lacui'impá al Abismo. Tijouła' tima'am'me nulemma. Lan xanuc' nomana' li'a łamats' tixim'me łinneja łocuacionaya. Iłque nopa'a luyaipa quitine, itsiya ailopa'a. Tixim'me laxpaiqui'. Tołta'a ti'i'mola' iłne petsi liłpuftine aiqiniłingiya al je'e. Iłe al je'e petsi liniłingiya liłpuftine pe napenufpá al c'a liłpitine aimijouya. Lilajmpa li'a łamats' iłna'a łaftiné joupa inilingiya jiiya al je'e.

⁹”Pe ts'ac'a liłpicuejma' iłne ticuec'e'me laifmipo'. Lan caitsi hjuac łinneja, iłne acaitsi lijualay. Iłpe ticutsafya łaca'no'. Lan caitsi lijualay jouc'a ti'onłcospola' acaitsi lan rey. ¹⁰Iłniya lan rey, amaxi' joupa iłonc'empola' micuxeyi. Anuli ticuxe itsiya. Łocuena ticuaihuo, ticuxe'ma. Iłque locuxeya aimicołya.

¹¹”Cal cuecaj coyac' quinneja nopa'a luyaipa quitine, itsiya ailopa'a, ticuaiconno, iłque ocuenaj rey, cal paico. Tijouła' ticuxete iłne lan caitsij rey, iłque ticuaihuo, ticuxe'ma. Tijouła' tejac'ma nulemma.

¹²”Limbamaj quecala' loximpa, iłne locuenaye lan rey. Iłniya aiqilepenufi locuxeyacu, tepenuf'me. Iłne y cal cuecaj coyac' quinneja tepi'im'mola' liłmane. Ticuxe'me to anuli 'hora. Aimicołyacola'. ¹³Iłne lan rey, anuli liłpicuejma'. Tixpic'e'me, ticuayi: 'Aimacuxeyacu illanc' całtuca'.

Toliya timetsaicom'me cal cuecaj quinneja. Tihuejcom'me iłque.'

¹⁴”Tijouła' jahuay iłniya tixtuc'o'me, tifule'me Ła'huaj Moł. Iłque Ła'huaj Moł iłPoujna jahuay lapoujnalá, iłRey jahuay lan rey. Toliya tulij'mola' laixtuc'opá. Petsi noyejmalepá, joupa ijoc'ipola', i'huif'epola', iłniya aimenajyacołtsi, ti'hua tiyejmaleyi.”

¹⁵Łapaluc quema'a ałpalaic'ocona'ma, ałmi: “Łaja łoximpa pe łocutsafya łaca'no', iłiya ti'onłcospa to lanxpela' xanuc', ituca' ituca' liłnación, lopalaipa ituca' ituca' liłtaiqui'. ¹⁶Cal cuecaj coyac' quinneja jouc'a limbamaj quecala' loximpa iłne tixtuc'o'me lixcay caca'no'. Tetets'i'me, texic'e'me limane, tipo'no'me quituca', amila. Tehuaitsoj'me liłpicixic', tite'me. Tipi'e'me lipecał.

¹⁷”Ma ŁanDios nicuxepola' liłpicuejma' iłne limbama' lan rey. Tołta'a i'e'me loxpicepa ŁanDios, ihuejco'me cal cuecaj coyac' quinneja. Iłque ticuxela'. Tijouła' tenanłta' jahuay loya'apa litaiqui' ŁanDios, łoyac' quinneja aimicuxeconaya. (Ma mehue'e' menanli loya'apa litaiqui' ŁanDios, ti'hua ticuxe iłque łoyac' quinneja. Tijouła' tenanłta' aimicuxeconaya.)

¹⁸”Łaca'no' łoximpa ti'onłcospa to al cuecaj quiłya', iłe liłya' incuxepa, ticuxela' lan rey nomana' ni petsi li'a łamats'.”

18 Lijou'ma aixim'ma łocuena capaluc quema'a imuyonni lema'a. Acueca' apaxi iłque. Epalc'o'i'ma jahuay li'a łamats'. ²Acueca' y axpaiqui' liłalai'ma. Iłpalai'ma ułfxi, tuya'e'.

- “iJoupa ecangemma, i'ipa camats'
al cuecaj quiŷya' Babilonia!
Itsiya ailopa'a xanuc' iŷpiya,
timana' ma le'a lontahue.
Iŷpiya timana' lan xujc'a
contahue, timana' lan xujc'a
caca'hui naiyulpá, iŷniya pe
lan xanuc' texts'eyi.
- ³ Luyaipa quitine tixoqui quileta
lan xanuc' quiyouyomma lan
nación tiyeyi titsufoŷaiyi jiŷpe
al cuecaj quiŷya'.
Iŷiya liŷya' ti'onŷcospa to quixcay
caca'no', i'e'mola' lan xanuc'
camac'ta to lisnaye.
Lan rey nomana' li'a ŷamats'
tihuejyi liŷya' to mihuejyi
ŷixcay caca'no'.
Nocucalépá ti'najnufyi locujyacu,
ticujconayi ulij'me acuecaj
quiŷ'huexi.”
- ⁴ Aicuej'ma ŷocuena tipalay pu'hua
lema'a, timila' lixanuc' ŷanDios:
“Imanc' aixanuc' tolipalunca
jiŷpiya liŷya'.
Ja'ni aimolipalumma tonŷe'me
lixcay to lo'epa iŷpiya.
Tijouŷa' imanc' jouc'a lan
xanuc' nomana' jiŷpe liŷya'
titeŷmim'molhuo' anuli.
- ⁵ Axpe' camats' ti'eyi juaiconapa
lixcay.
Iŷe liŷpixcay i'ipa to anuli cal cuecaj
quijuala, icula'apa icuaita lema'a.
Itsiya linca, ŷanDios
aimiŷonc'e'eyacola' liŷjunac'.
- ⁶ Iŷiya liŷya' ma to li'e'epolhuo'
imanc' toŷe'econtsa xonca.
Iŷe lixcay li'epa, toŷpai'iconeŷ
oquemma.
Ihuants'i lixcay loŷsnapa, imanc'
toŷhuants'i'me xonca lixcay
loxnaya.
- ⁷ Iŷiya liŷya' i'epoxi to acuecaj
caca'no', iŷque nipajmpa ac'a,
tenant'li jahuay lojanajpa.
Itsiya imanc' toŷteŷmife
juaiconapa, tixinŷa' acuecaj
cumla, tixhueŷcoŷa', tijojla'.
Luyaipa quitine ticua: 'Jifa'a
cacutsu, cacuxe to cal cuecaj
quincuxepa.
Iya' a'i nimpotsate, jouc'a
aimaŷ'iya toŷta'a.
Aicaxhueŷcoya ni cajojya, ni
anulemma.’
- ⁸ Iŷe linespa aiqixpic'e ŷanDios,
toŷiya icuaico'ma lateŷcoya.
Iŷe litine jiŷpe liŷya' lan xanuc'
tixim'me lamaya, tixim'me
lumemma, tixhueŷmot'ŷe'me,
tijojhuaŷque'me.
Ipaŷ cunga tipi'e'ma nulemma
liŷya', ti'i'ma capi', tejac'e'ma.
Tipa'a acueca' lipujfxi ŷaŷPoujna
ŷanDios, iŷque Noteŷmiya iŷe
liŷya'.”
- ⁹ Lan rey nomana' li'a ŷamats'
tixim'me tiŷ'aqui ŷicuxis mepi liŷya'.
Luyaipa quitine iŷne lan rey ac'a
lomajmpa jiŷpe al cuecaj quiŷya'.
To cal xujc'a caca'no' iŷque liŷya'
tepi'ila' lojanajpa. Itsiya iŷniya
tijolijyi, tija'ayi. ¹⁰ Tecaxoŷyi aculi'.
Tixpailiquila'. ŷunga tipi'enni jiŷiya
liŷya', timiyi:
“iBabilonia, ima' uncuecaj
quiŷya!
iŷma' mujfxi quiŷya!
Joupa ixcaiyoŷpo', uncuanuc',
aiquicoŷi loteŷcopa.
Tijouŷa' ma le'a to anuli 'hora
joupa eteŷquemmo'.”
- ¹¹ Nocucalépá nomana' li'a ŷamats'
jouc'a tijolijyi, tixhueŷcoyi acueca'
quihuotsoqueya. Itsiya, ŷnaitŷi

no'najá ts'it'it'ic' ihniya? Ailopa'a no'najá. Joupa etelquemma liŷya'.
 12Ihniya nocucalepá it'it'ic' al 'oro, al plata, lapic' acueca' quipitali, jouc'a lam perla. It'it'ic' al c'a quijahua' al fujca, jihya cuftine lino, jouc'a lijahua' ummangaic' unxałcumi jouc'a unxali. Jouc'a it'it'ic' lijahua' aseda. It'it'ic' al c'a c'ec, tujuej c'a, it'it'ic' lilajncopa amárfil, it'it'ic' lilajncopa al c'a c'ec acueca' quipitali, it'it'ic' lilajncopa abronce, lilajncopa atejma', it'it'ic' lilajncopa łapic cuftine mármol.
 13It'it'ic' cal canela, jouca' łupa c'ec łojuepa c'a, jouc'a łipa' c'ec, jouc'a licat'ła al 'ec cuftine mirra, jouc'a al 'ec cuftine olíbano. It'it'ic' al vino, laceite, jouc'a cal 'harina trigo, jouc'a lan trigo. It'it'ic' lam mot'ł, jouc'a locuenaye quinneja. Jouc'a it'it'ic' laihuale, it'it'ic' lan carro jouc'a liłxanuc' joupa i'nampola'. Jouc'a it'it'ic' locuenaye lan xanuc' ticuj'me. 14Nocucalepá timiyi liŷya':
 "It'e lofjanajpa aimapenufconaya, jahuay al c'a loftepa joupa ailopa'a.
 Al c'a lopijahua', jahuay łola'acoyoxi, joupa ejac'pa nulemma, aimoxingonaya."
 15Nocucalepá jouc'a no'najualepá it'it'ic' nolijpá juaiconapa jilpe al cuecaj quiłya', ihniya tecaxolaiyi aculi'. Tixpailiquila' łunga. Tipi'enni liŷya'. Tijolijyi, tixhuełcoyi acueca' quihuotsoqueya. 16Ticuayi:
 "Ay, acuanuc' it'a'a al cuecaj quiłya'.
 Li'ipa i'huáqui to łaca'no' łetejyoxi al c'a, lipijahua' ilajncopa lan c'a quijahuali, to al fujca quijahua' cuftine lino.

Jouc'a ilajncopa lunxałcumi quijahua', jouc'a lunxali quijahua'.
 Ipo'no'ma łila'acoyoxi ilajncopa a'oro, ilajncopa apic' acueca' quipitali, jouc'a lam perla.
 17Icoł'ma ma le'a anulij hora liteł'mim'me.
 Luyaipa quitine acueca' h'ihueca, itsiya joupa ijounapa."
 Tecaxolanna aculi' lan xanuc' nocuxepá liłbarco, jouc'a noyepá lam barco, jouc'a jahuay no'epá canic' jilpe łaja. 18Lixim'me łicuxis pe it'it'ic' lepipa al cuecaj quiłya' tija'ayi, ticuayi: "¿Te tipa'a acueca' quiłya' lo'onłcospa to ihya al cuecaj quiłya'? A'i. Ailopa'a co'onłcoya." 19Tija'ayi, tijolijyi, tixhuełcoyi acueca' quihuotsoqueya. Tejuaf'iyoltsi capi' liłjuac'. Ticuayi:
 "Ay, acuanuc' juaiconapa jihya al cuecaj quiłya' Babilonia.
 Luyaipa quitine acuecaj tomí tipa'a jilpiya.
 Liłpoujnalá jilne lam barco loyepá łaja tulijyi juaiconapa. Jilpe liŷya' ti'naji it'it'ic' liłbarco. Itsiya joupa ejac'pa; ma le'a anuli 'hora icoł'ma liteł'mimpa.
 20i'Tixojla' cunlata imanc' nołmana' lema'a!
 Imanc' ixanuc' łanDios, imanc' unlihuequi Jesús, imanc' unc'iprofeta noluya'apá loxpicepa łanDios, jahuay imanc': i'Tixojla' cunlata! Joupa etelquemma al cuecaj quiłya', it'e liŷya' iteł'mipolhuo', itsiya łanDios iteł'miconapa, i'epa łijca li'e'epolhuo'."
 21Anuli cal cuecaj capaluc quema'a ipulał'ma cal cuecaj caxpehui capic, ecajm'mi'ma łaja, ticua:

“Hque cal cuecaj capic
nulemma necajm'mipa łaja,
if'acaipa, aimipajnconaya,
aimixingonayacu.
Ma tołta'a etelquemma al cuecaj
quiłya' Babilonia, if'acaipa,
aimipajnconaya.

- ²² Luyaipa quitine jilpe liłya'
tunayi lił'harpa, tunac'liyi,
tifus'miyi liłflauta, tifus'miyi
liłtrompta.
Itsiya a'i, iłpiya
aimunaconayacu.
Luyaipa quitine iłpiya timana'
lan xanuc' acuecaj liłpicuejma',
tilanc'eyi al c'a.
Itsiya a'i, iłpiya
aimixingonayacu ni anuli cal
xans ts'ipicuejma'.
Luyaipa quitine jilpe ticuequinni
hilepic molino, titajyi lan trigo.
Itsiya a'i, joupa i-ch'ixcopa,
aimicuejconayacu.
²³ Luyaipa quitine jilpe ulif'iya
epalałc'o łajut'hi.
Itsiya a'i, i'ipa pangay muf, jilpe
aimulif'iconaya, ni anuli
lepalc'o'.
Luyaipa quitine jilpe tixoqui
quileta tipalaic'oyołtsi,
temalliyi, ti'eyi liłjuic.
Cal xans tipalaic'o hipeno,
łaca'no' tipalaic'o hipe'ailli'.
Itsiya a'i, aimicuejconayacu
tołta'a, aimipalaic'oconayołtsi.
Luyaipa quitine ipalunca jahuay
li'a łamats', tiłcuaiyumma
jiłpiya lan tsilaj xanuc'
nocualepá, ticujiyi liłtaic'.
Itsiya aimi'econayacu tołta'a.
Ima' cumBabilonia, to cal bruja
tofel'mila' jahuay lan xanuc'
nomana' li'a łamats'.”

²⁴ Hpe al cuecaj quiłya' Babilonia
ixim'me lixcuajaiquemma liłjuats'
iłne lam profeta, lixcuajaiquemma
liłjuats' lixanuc' ŁanDios, iłne
i'huexi ŁanDios. Ma jilpe liłya'
ixim'me jouc'a lixcuajaiquemma
liłjuats' jahuay noma'ampola', iłne
lan xanuc' naihuejpa ŁanDios. He
liłya' itaiyinge lajunac'.

19 Lijou'ma aicuej'ma tipalaiyi
ujfxi axpela' lan xanuc'
pu'hua lema'a, ticuayi:

“iAleluya! iX'najtse'eya łalPoujna
ŁanDios! Hque joupa ulijpa.
Timetsaiconte anDios, ma le'a
iłque cal Cueca', iłque quituca'
nipajnya ti'ay.

- ² No'epá quixcay a'i
munt'u'enyacola',
ŁanDios titeł'mi'mola', alijca
titeł'mi'mola', aimuyaipa
xpijma.
Itsiya joupa iteł'mipa łaca'no'
no'epa acuecaj quixcay.
Ni petsi li'a łamats' iyu'iyalepa
lipixcay qui'ejma',
itac'uiyalepa ti'ete tołta'a.
Ima'apola' lixanuc' ŁanDios pe
no'epá lipenic'.
ŁanDios joupa iteł'mipa
łixcay caca'no', ipai'iconapa
li'e'yalepa.”

³ Tinesconayi:
“iAleluya! iX'najtse'eya
łalanDios!
Liłya' ti'hua tipi, aimipica, ti'hua
tił'aqui hipicuxis.”

⁴ Lan nuxans malujxi' lan tsilaj
xanuc' noxpijpa łataiqui', jouc'a
lam malujxi' lam paxi quinneja,
exc'onłingołai'me ŁanDios
Nocutsuya pe li'nof'quiya. Ticuayi:
“Amén, tołta'a ti'ila’.

iAleluya! iX'najtse'eya ÆanDios!"

⁵Tipamma lataiqui' pe lopa'a
li'nof'quiya, timila' lan xanuc':

“Jahuay imanc' non'epá lipenic'
ÆanDios to'Poujna, imanc'
no'simpá acueca' ÆanDios,
ja'ni unc'atsocay xanuc', ja'ni
unc'atsilaj xanuc',
itixojla' cunlata, to's'najtsi'ile
ÆanDios!"

⁶Aicuej'mola' tocomma to
juaiconapa axpela' lan xanuc'
tipalaiyi. Aicuej'ma lopalai
tocomma to ti'nixma axpe' caja',
tocomma tunalequi juaiconapa.
Ticuayi:

“iAleluya, x'najtse'eya ÆanDios!
IÑque a'Poujna, ticuxela' jahuay,
ma le'a iÑque a'Rey, ma le'a
iÑque ticuxe.

⁷iTixojla' calata alunac'ile!
A'mi:le: 'Ma' ima' manDios'.
Itsiya ijuic Æa'huaj Mo', ilejma
lipeno.

IÑque Æahuats' joupa
imetsaicompa, ailopa'a
quehue'e'.

⁸Joupa epi'impá lipijahua'
juaiconapa tunts'ifqui, ile
alino afujca.
To'ta'a li'pijahua' lepi'impola'
petsi i'huexi ÆanDios,
iñniya mimana' li'a lamats' i'epá
al c'a.”

⁹Æapaluc quema'a a'mi: “Taini'Ha:
Ti'e'ela' juic Æa'huaj Mo', tileco'a'
hipeno. Ixojma quileta lan xanuc'
lijoc'impola' iñiya al juic.” Jouc'a
a'mi: “Al linca laimipo'. Mañiya
itaiqui' ÆanDios.”

¹⁰Iya' co'a' nexc'on'ingai'ma
Æapaluc quema'a. IÑque a'mi: “A'i.
Aimo'e'me to'ta'a. Ma' anuli la'penic'

iya' ima' jouc'a lopimaye noya'apá
litaiqui' Jesús. Taxc'on'ingai'la' ma
le'a ÆanDios. Illanc' naluya'apá
litaiqui' Jesús, jahuay ninc'ipofeta,
a'muc'inga' cal Espíritu Santo.”

¹¹Aixingonapa exiya lema'a. Ji'pe
tipa'a anuli cal fujca caihuala. IÑque
Æanafcaic' Æaihuala cuftine: IÑque
Aimixospa. IÑque Noya'apa al Linca.
IÑque mite'mila' lan xanuc' ti'ay
al hijca, jouc'a a'hijca tifulicojma.

¹²Li'u' tocomma to lipa' cunga.

Lijuac tipa'a axpe' corona. Ji'piya
tini'ijnya lipuftine. IÑque linca
ticuec'e iñiya laftine, locuenaye
aimicuec'eyi. ¹³Ipo'xqui unxali
lipijahua', ummanc'ecompa ajuats'.

IÑque ipuftine: Litaiqui' ÆanDios.
¹⁴Axpela' ilejmale, iñne nomana'
lema'a, lif'as soldado. Ilenafcaic'
jouc'a lan fujca caihuale. Ipo'nohua
li'pijahua' ilajncopa al c'a quijahua'
cuftine alino. Iñiya lijahua' afujca
juaiconapa, tunts'ifqui. ¹⁵Lico
tipamma al cuecaj cutsilo
juaiconapa quix'ay, tixcai'eco'mola'
lan xanuc' nomana' li'a lamats'.

Acueca' ipujfxi ticuxe'mola'.
Timuc'i'mola' lan xanuc' lipoyac'
ÆanDios, iÑque cal Cuecaj Ts'ipenic'
Nocuxepola' jahuay, ixtupa.
Tite'mi'mola', ti'huailsuf'mola' to
mi'huailequi'me lan uva, tipa'anni
lijya'. ¹⁶Lipijahua' jouc'a litungu
li'mis ini'ingiya lipuftine ticua: Iya'
xonca cacuxela' jahuay lan rey. Iya'
i'Poujna jahuay lapoujnalá.

¹⁷Aixim'ma anuli Æapaluc
quema'a tecaxijnya pe Æopa'a
cal 'ora. Tipalaic'ola' jahuay lan
tsilaj cac'a'hui miyulyi nolojmay
lema'a. Timila': “Ton'ouyunca.
Tolafot'letsot'si petsi ÆanDios

lo'eyopa licuecaj juic. ¹⁸Tohtëte liłpixic' lan rey jouc'a liłpixic' lincuxepá soldado, jouc'a liłpixic' lan soldado, jouc'a liłpixic' laihuale jouc'a liłpixic' lilenafcaic'. Tohtëte liłpixic' jahuay lan xanuc'. Ja'ni quihuca' nocuxepołtsi, ja'ni liłpoujnalá ticuxela', ma' anuli tohtëte liłpixic'. Tohtëte liłpixic' lan tsoyay, lan tsila' jouc'a."

¹⁹Aixim'mola' cal cuecaj coyac' quinneja y lan rey nomana' li'a łamats', jouc'a liłsoldado. Joupa efołumma tifuli'i'me łenafcaic' cal fujca caihuala, jouc'a tifuli'i'mołtsi lisoldado. ²⁰I'nołim'me cal cuecaj coyac' quinneja jouc'a liłprofeta nofel'miyalepa. Iłque liłprofeta li'ipa epi'imp'a quimane cal cuecaj coyac' quinneja ti'eł'a' al cueca'. Tołta'a ifel'mi'mola' pe nepenufpá lisello cal cuecaj coyac' quinneja. Iłne lan xanuc' exc'onłingołai'me cal imagen, iłque lo'onłcospa to łinneja. Iłne loquexi', ma quihmaf'i', i'nij'mim'mola' al cuecaj capa imanna cunga, tipi łazufre. ²¹Łenafcaic' quipihuala pe łaipaiyomma lico al cuecaj cutsilo, tima'ala' locuenaye lixanuc' al cuecaj coyac' quinneja, tima'acola' iłhiya al cutsilo. Lan tsilaj cacal'hui naiyulpá lema'a titejn-nila' liłpixic'. Ti'hua titeji tixhuaitsoła'.

20 Aixingo'ma ocuena łapaluc quema'a. Timuyomma lema'a. Inic' liyahui al cuecaj pu'hua. Jouc'a limane inic' al cuecaj cadena catejma'. ²⁻³Łapaluc quema'a ti'noli cal dragón, iłque łainofal nopa'a al te'a, łacui'imp'a Łonta'a Satanás. Ifi'e'ma. I'nij'mi'ma al cuecaj pu'hua. Tipajnl'a' imbamaj maxnu camats'.

Itahinc'i'ma cal sello. Aimipahuo cal dragón. Aimifel'miconayacola' lan xanuc' nomana' li'a łamats'. Tixhuaitso limbamaj maxnu camats' tux'masquim'me huata.

⁴Aixim'ma axpe' lan tsilaj asiento. Nocutshuołanna jilpiya epi'impola' liłmane ticuxete. Iłne aikuexc'onłingołai' cal cuecaj coyac' quinneja, aikuexc'onłingołai' cal imagen to'onłcospa łinneja, aikuilepenufi lisello łinneja, aikuiniłingiya hilepali ni liłmane. Iłhiya naihuejpá Jesús, noya'apá litaiqui' ŁanDios, tołhiya ima'ampola'. Tama ima'ampola', lił'alma imaf'i'. Timana' pe lopa'a Cristo. Imbamaj maxnu camats' anuli Cristo ticuxeyi. ⁵Iłhiya lan tet'ła łimaf'i'ina'pol'a'. Tijouł'a' limbamaj maxnu camats' locuenaye limanapola' timaf'ina'me. ⁶Tixoqui quileta lan tet'ła łimaf'i'ina'pol'a'. Iłne łınca ixanuc' ŁanDios, i'huexi iłque, aimimaconayacola' oquemma. Lamaya aimima'aconayacola' nulemma. Iłne e'aillí ŁanDios, e'aillí Cristo, ti'eyi lipenic'. Limbamaj maxnu camats' tiyejmale'me Cristo, ticuxe'me anuli.

⁷Tixhuaitso limbamaj maxnu camats' tux'masquim'me Satanás. Jilpe lifingiya tif'ajnahuo, tipahuo. ⁸Ni petso li'a łamats' ti'hua tifel'mila' lan xanuc', lan nación, iłne pe aimihuejyi ŁanDios.

Lan xanuc' lacui'impola' Magog, nocuxepola' lacui'imp'a Gog, Satanás tefot'łela' tifule'me. To axpe' cal cuixa łopa'a łema' caja, tołta'a axpela' iłhiya, aimi'iya mixhuej'menyacola'. Tifule'me.

⁹Tipalyomma ni petso li'a łamats'.

Icuaiyunca pe lefoŷya lixanuc' ÆanDios. Jiŷpe al cuecaj quiŷya' pe ts'ipic'a ÆanDios, maŷpe lomanc'epa lixanuc', if'em'mijpá. Aiximpa iŷpe ecangemma cunga lema'a, tipi'ela'. Joupa i'ipola' capi' lan xanuc' pe aimicuec'eyi ÆanDios. ¹⁰Cal Satanás nifel'miyalepa, i'nij'mim'me al cuecaj capa imanna cunga, tipi  azufre. Maŷpe lapa ti'nij'minni, joupa i'nij'mimpola' cal cuecaj coyac' quinneja jouc'a liprofeta ĩnifel'miyale. Itine ipuqui' tixin e acuecaj cumla. Aimijouya late coya, ti'hua ticol i.

¹¹Lijou'ma aixim'ma anuli al cueca' quexpats'qui li'nof'quiya afujca. Aixim'ma naitsi jiŷpe  ocutsuya. Lema'a y  amats' aimi'iya micoŷyacola' pe  opa'a jiŷque, tejac'mola'. Aimixinconayacola'.

¹²Aixim'mola' limanapola', lan tsila' y lan tsocay. Tecaxo anna jiŷpiya. Lan je'e pe liniŷingiya li'epa joupa uxpalaifquimpa. Iŷpe aixim'ma  ocuenaj je'e uxpalaifconame. Jiŷpe inihingiya liŷpuftine petsi nepenufpá liŷpitine aimijouya. Cal Juez tixhue lan je'e liniŷingiya li'epa limanapola'. Lijou'ma timila' lo'iyacola'. ¹³Ihne lomanapola' nomana'  aja ipalyonca. Jouc'a ipalunca petsi cuftine Hades, petsi Lamaya ummepola'. Limanapola', ma' anuli to li'epa, ti'i'ma lo'iyacola'. To ta'a lomipola' cal Juez. ¹⁴Jiŷpiya al cuecaj capa imanna cunga ti'nij'minnila' Lamaya jouc'a i e al lugar cuftine Hades. ¹⁵Jiŷpe al cuecaj capa imanna cunga, ti'nij'minnila' jouc'a jahuay petsi aiqunihingiya liŷpuftine jiŷe al je'e. I niya petsi ninihingiya liŷpuftine, pe joupa

nepenufpá liŷpitine aimijouya, aiqunij'minnila'.

21 Aixim'ma al ts'e quema'a y ats'e  amats'. Ailopa'a caja. Lomana' itsiya lema'a y li'a  amats' joupa ejac'pola'. ²Aixim'ma al Paxi Quiŷya', i e al ts'e Jerusal en imuyomma lema'a pe lopa'a ÆanDios. Ihiya al cuecaj quiŷya' etejyoxi juaiconapa al c'a, ma to metej'moxi  ahuats' namaneya, litine tilecola' ĩpe'ailli'.

³Aicuej'ma anuli tipalay, i que  opa'a jiŷpe lexpats'qui li'nof'quiya. Tipalay ujfxi, ticua:

“iToxin a', icuaico'me ÆanDios y lixanuc', itsiya timajm'me anuli!

ÆanDios tines'ma: ‘I ne ĩnca aixanuc', iya' ilenDios’.

I que ĩlenDios aimecanujyacola' quiŷtuca’.

⁴ÆanDios tetufc'ena'mola' lilujay lixanuc', aimijolijconayacu.

Iŷpe litine aimi'iya camaya, tijouna'ma nulemma.

Aimixhuelmot'leconayacu, aimijolijconayacu, aimite conayacu cumla.

Ti'ila' to ta'a joupa ipaicopa jahuay.”

⁵Nocutsafya lexpats'qui li'nof'quiya ticua: “iToxin a'! Ca'e'econghua ats'e.” A palaic'opa, a mi: “Tainihijnla' laifmipo' itsiya. Al ĩnca laitaiqui', aimipaicoya.”

⁶Ti'hua a palaic'o, a mi: “Joupa enan pa jahuay laimipo'. Iya' a on cospa to  ainila cal A, jouc'a a on cospa to  ainila cal Z. Iya' aipangopa jahuay, iya' jouc'a cajou'ne'ma jahuay. Pe  aicuipa quija' iya' cuhui'i'ma quija', tixna a’

petsi laipayomma laja', ihe lapi'iya lipitine aimijouya. Aica'najtsi'iya, ma le'a cuhui'i'ma tixnała'.

⁷”Cal xans nolijya, tołta'a ti'i'ma, tołta'a tepenuf'ma. Iheque ai'hua, iya' enDios, aicacanujsya. ⁸Ituca' lo'iyacola' pe notaipá calaic'ata, ihe aimalihuequi. Jouc'a ituca' lo'iyacola' pe aima'huaiyinge, jouc'a iñniya lan xujc'a xanuc', jouc'a noma'ahualepá, jouc'a nahuepá quileca'no', jouc'a lam brujo, jouc'a naxc'onlingołaipá lilendiosla', jouc'a linfel'miyalepá. Jahuay iñniya tepenuf'me lapi'iyacola'. Tecajm'mim'mola' al cuecaj capa imanna cunga, tipi łazufre. Tołta'a lo'iyacola' pe nomaconayacola' oquemma.”

⁹Jiłpe lema'a lan caitsi capaluc' quema'a liluhuaic' liłtaza, ihe imanohila' lan caitsi lijoucola' catełcoya, anuli iñniya lapaluc' quema'a ałpalaic'o, ałmi: “To'huanni. Łepá. Camuc'ito' łahuats' namaneya. Ła'huaj Moł tileco'ma.”

¹⁰Lijou'ma aixim'ma to i'hua'ma laipicuejma', ałheco'ma al toncay anuli cal cuecaj quijuala itoqui. Aixim'ma al Paxi Quiłya' Jerusalén timuyomma lema'a pe lopa'a ŁanDios. ¹¹Iłta'a liłya' epalc'o'. Lipepalc'o' małe lipepalc'o' ŁanDios. Ma to munts'ifqui łapic acueca' quipitali, ma tołe tepalc'o'i al Cuecaj Quiłya', tunts'ifqui to łapic cuftine jaspe, cangufca i'huáqui. ¹²Canumicay liłya' tipa'a cal cuecaj quitoqui caitał. Ihiya łaitał tipa'a imbamaj coque' lipuertá. Jiłpe cal puertá tecaxołanna lapaluc' quema'a, anuli anuli al puerta. Iłpe cal puertá inilingiya liłpuftine

limbamaj coquexi' linaxque' cal xans Israel, ihe lałtatahueló. Apuerta apuerta tipa'a lipuftine. ¹³Iłpe łaitał lehuoc'ocojma laipammaiyomma cal 'ora tipa'a afane' cal puertá. Lehuoc'ocojma lo'huayomma łujfxi cahua' tipa'a afane' cal puertá. Lehuoc'ocojma lo'huayomma łahua' quema caja tipa'a afane' cal puertá. Lehuoc'ocojma lo'acaiyopa cal 'ora tipa'a afane' cal puertá. ¹⁴Iłpe łipitał liłya' itsahuecomma imbamaj coque' lapic'. Anuli anuli łapic tiniłijnya anuli laftine. Liłpuftine ihe limbamaj coquexi' lan apóstole, ihe ts'ilihuequi Ła'huaj Moł.

¹⁵Łapaluc quema'a łałpalaic'o'ma itaic' łoxpijcompa. Tocomma al łaj-jaxa, ilajncopa a'oro. Tixpijta iłpe liłya' jouc'a lipuertá, jouc'a łipitał. ¹⁶Liłya' ma' anuli lipitoqui lipexpats'qui. Łapaluc quema'a tixpicufi liłya'. Lixpicufpa imbamaj coquej mil estadio. Liłya' lipitoqui, li'nofquiya, lipexpats'qui ma' anuli lixpicufpa. Ihe limbamaj coquej mil estadio ixhuaitsi to oquej mil, oquej maxnu kilómetro. ¹⁷Tixpicufi łaitał ma to mixpicufyi lan xanuc', ma tołe tixpicufi łapaluc quema'a. Iheque łaitał tixhuaispa anuli maxnu oquej nuxans malpu codo. (Tocomma to afane' nuxans y amaque' metro.)

¹⁸Łaitał ilajncopa łapic cuftine ajaspe. Liłya' ilajncopa a'oro xonca al c'a. Tunts'ifqui to al pulu lepaquiya.

¹⁹Pe lipanc'micopa łipitał liłya' i'huáqui ac'a juaiconapa, ilanc'empa al c'a. Iłpiya timana' imbamaj coque' lapic', acueca' ipitali

ihniya lopic'. Cal te'a capic ajaspe, lihuequi azafiro, locuena a'ágata, locuena a'esmeralda, ²⁰locuena asardónica, (iḷque a'onix), locuena acornalina, locuena acrisólito, locuena aberilo, locuena atopacio, locuena acrisoprada, locuena ajacinto, hijoujma capic a'amatista. ²¹Limbamaj coque' lipuertá ilajncopa aperla. Anuli anuli lipuerta ilajncopa anuli cal perla. Al cuecaj cane liḷya' ilajncopa a'oro xonca al c'a. Tunts'ifqui to lepaquiya al pulu.

²²Iḷpiya aicaixim'ma xoute'. Ailopa'a. Iḷpiya liḷya' tipa'a ḷaḷPoujna ḷanDios, ticuxe jahuary. Lan xanuc' texc'onḷingoḷaiyi ḷanDios, texc'onḷingoḷaiyi ḷa'huaj Moḷ. ²³Ni cal 'ora ni cal mut'la aimepalc'o'i liḷya'. Aimicuicomma. Ma ḷanDios lipepalc'o' tepalc'o'i, ḷa'huaj Moḷ jouc'a epalc'o'. ²⁴Iḷe lipepalc'o' iḷpe liḷya' tepalc'o'ila' lan nación, tiyeḷe al c'a lan xanuc'. Iḷpiya liḷya' tiḷcuaispa lan tsila' quincuxepá nomana' li'a ḷamats'. Iḷtaic' cal cueca' quiḷhuexi tipo'nota jiḷpe.

²⁵Cal puertá timanemma exiliya. Iḷpe pangay quitine. Aimimufc'o'. Ailopa'a quipuqui', aimixnif'miya cal puertá. ²⁶Iḷpe tiḷcuaispa lan xanuc' quiyoyomma jahuary lan nación. Tiḷcuai'espera al cueca' quiḷhuexi, jahuary al c'a li'hueca. ²⁷Jiḷpe titsuḷfaiyi ma le'a lan xanuc' liniḷngiya liḷpuftine lije'e ḷa'huaj Moḷ, iḷe al je'e petsi liniḷngiya liḷpuftine pe nepenufpá liḷpitine aimijouya. Aimitsuḷfaiya jiḷpiya petsi aimetenḷma ḷanDios. Jouc'a aimitsuḷfaiyacu pe no'epá al xujc'a, ni nofel'miyalepá.

22 ¹⁻²ḷapaluc quema'a aḷmuc'i'ma al pana'. Jiḷpe al pana' a'i quijuet' laja', tunts'ifqui to lepaquiya al pulu. Al pana' tipayomma lexpats'qui li'nof'quiya pe lomana' ḷanDios y ḷa'huaj Moḷ. Tinu al cuecaj cane liḷya'. Jahuary noxnapá jiḷe laja' ti'hua ts'iḷmaf'i'. Lema ḷema al pana' tipa'a al 'ec. Notepá ḷi'as iḷe al 'ec tepenufyi liḷpitine aimijouya. Amut'la amut'la al 'ec ti'atsi. Tixhuaitsi anuli camats' joupa i'aspa imbamaj coquemma. Afxi ḷipela, tixaḷ'mela' lan xanuc' nomana' lan nación. ³Jiḷpe tipa'a ma le'a letenḷcocolpa ḷanDios. Licuajquimpa ailopa'a. Maḷpe liḷya' tipa'a lexpats'qui li'nof'quiya pe lomana' ḷanDios y ḷa'huaj Moḷ. Lan xanuc' naimetsaicopá ḷanDios to quiḷPoujna, iḷpiya ti'eyi lipenic', texc'onḷingoḷaiyi pe ḷopa'a. ⁴Tehuelojnyi li'a ḷa'huaj Moḷ, lipuftine tiniḷjnya ḷilepali. ⁵Iḷpe ailopa'a quipuqui'. Aimicuicomma quepalc'o', ni ḷepa' 'ora ni ocuena quepalc'o' to lapalc'o'ipa ḷamats'. IḷiḷPoujna, iḷque ḷanDios, tepalc'o'ila'. Lixanuc' ticuxe'me, aimijouya liḷcuxejma.

⁶ḷapaluc quema'a aḷmi: “Al linca jiḷe lataiqui' laifmipoi'. Ma toḷta'a ti'i'ma. ḷanDios, iḷque ḷiḷPoujna lam profeta, alummepa iya' epaluc. Aḷmuc'ipa lo'iya. Lixanuc' no'epá lipenic', ḷanDios ipic'a ti'ila' quiḷsina' iḷe lo'iya.”

⁷“i'Toxinḷa'! Aimaḷcoḷya. Ma cacuaihuo. Tixoquei queta naitsi nopo'nopa cuenna loya'apa ḷanDios, iḷe litaiqui' liniḷngiya fa'a iḷta'a al je'e.”

⁸Iya' ninJuan joupa aicuejpa ihniya lataiquí, joupa aiximpa

li'ipa. Tohiya nexc'onlingai'ma li'mitsi' lapaluc quema'a, itque lahmuc'ipa tofta'a, ite jousa ninilpa fa'a al je'e. ⁹Lapaluc ałmi: "A'i. Aimo'e'ma tofta'a. Jahuay a'eyi lipenic' lałPoujna LanDios, ima' jouc'a lapimaye lam profeta, jouc'a no'epá cuenna lominilijmpa fa'a itta'a al je'e. Taxc'onlingaiła' LanDios." ¹⁰Jouc'a ałmi: "Itta'a al je'e aimoxpats'ijm'ma lisello. Jifa'a tinitijnya lixpice'epa LanDios. Itsiya aimicołya, ma ti'i'ma. ¹¹Cal xans latentocopa lixcay lo'epa, ti'hua ti'econła' lixcay. Cal xans latentocopa al xujc'a lo'epa, ti'hua ti'econła' al xujc'a. Cal xans latentocopa al c'a lo'epa, ti'hua ti'econła' al c'a. Cal xans pe i'huexi LanDios ti'hua tihuejla' LanDios, aimenaj'moxi."

¹²"iToxinła'! Aimałcołya. Cacuaicoconno. Lan xanuc' to lo'epa, ma' anuli tepenufconame. Cacuaiyunni, lan c'a xanuc' tepenuf'me al c'a. Lixcay xanuc' tepenuf'me lixcay. ¹³Iya' ałonłospa to łainila cal A, jouc'a ałonłospa to łainila cal Z. Aipangopa jahuay, jouc'a jahuay cajou'ne'ma. Iya' ninTe'a jouc'a niJoujma."

¹⁴Tixoj'ma quileta petsi jousa epajpa liłpijahua', LanDios tixim'mola' limpio. Ihiya tepi'i'mola' liłmane titele hi'as al 'ec lapi'iyacola' liłpitine aimijouya. Titsuflai'me cal puertá, timajnta jilpe al Paxi Liłya'. ¹⁵Luna timana' lan xujc'a xanuc' lo'onłospola' to lan tsiłqui. Jouc'a timana' lam brujo, jouc'a pe nahuepá quilecał'no', jouc'a noma'ahualepá, jouc'a pe naxc'onlingołaipá

lilendiosla', jouc'a pe natets'ipá al hinca, jouc'a linfel'miyale.

¹⁶"Iya' ninJesús nummepa łainepaluc. He laitaiqui' lomuc'imp'o' cu'ila' jahuay lapimaye lolafot'lepotsi. Iya' lanef'epa cal rey David, itque aitatahuelo. Iya' capalc'o'i acueca', tofta'a lacui'impa ninXamna Quihic'ejma."

¹⁷Cal Espiritu Santo jouc'a łipeno cal Moł timiyi: "iTo'huanni!"

Naitsi nocuejpa ite lataiqui' jouc'a timiła': "iTo'huanni!"

Imanc', ja'ni ticui conłja, toliłoc'ołaiyunca. Laja' lapi'iyacolhuo' lołpitine aimijouya, tołsnałe. He laja' tepi'im'molhuo', aimi'najtsi'inyacolhuo'.

¹⁸Lataiqui' linitiya fa'a al je'e ma' itaiqui' LanDios, tuya'e' lixpice'epa. Iya' camilhuo' jahuay imanc' nołquim'epá: Aimolatonc'i'me. Ja'ni tolatonc'i'me LanDios xonca' titeł'mi'molhuo'. Titeł'mi'mołhuo' to liniłingiya jilta'a al je'e, ite tuya'e' lixpice'epa LanDios.

¹⁹Jouc'a aimoliłonc'e'me anuli lataiqui'. Ja'ni toliłonc'e'me anuli jilta'a lataiqui' LanDios tiłonc'e'e'molhuo' lapi'ipola' lixanuc', ite loya'apa itta'a al je'e. Tofta'a aimepi'inyacolhuo' lane mołtejacu hi'as jile al 'ec lapi'ipola' lan xanuc' liłpitine aimijouya. Aimołsulfaiyacu al Paxi Quiłya'.

²⁰Lataiqui' linitiya fa'a al je'e itaiqui' Nopalaipa itsiya, ticua: "Łinca cacuaiyoconno. Aimałcołya."

Amén. Tofta'a ti'ila'. Ima' maiPoujna Jesús: iTo'huanni!

²¹LałPoujna Jesús mouqui mouqui titoc'itsolhuo' jahuay imanc'. Amén. Tofta'a ti'ila'.